

清

史

稿

清史稿

屬國傳二

越南

越南先稱安南順治初安南都統使莫敬耀來歸未及授爵而卒尋授其子莫元清爲安南都統使十六年八月經略大學士洪承疇始奏言安南國遣目吏玉川伯鄧福綏朝陽伯阮光華齎啟赴信郡王軍前抒誠納款十七年九月黎維祺始自稱國王奉表貢方物帝嘉之賜文綺白金十八年敕曰朕惟修德來遠盛代之宏謨納款歸仁人臣之正誼旣輸誠而向化用錫命以宣恩褒忠勸良典至重也爾安南國王黎維祺僻處炎方保有厥衆乃能被服聲教特先遣使來歸循覽表文惻忱可見古稱識時俊傑王庶幾有之用錫敕獎諭仍資爾差官釵仁根銀幣衣服等事遣通事序班一員伴送至廣西沿途撥發兵馬導之出疆爾受茲寵命其益勵忠節永作屏藩恪守職貢丕承無斁欽哉未幾維祺卒子維禔嗣尋又卒子維禧嗣康熙二年十一月維禧遣黎敷等表謝附貢

方物三年二月遣內院編修吳光禮部司務朱志遠諭祭故王維祺維祺五年五月維祺繳送故明王永曆敕印遣內國史館翰林學士程方朝禮部郎中張易貲冊封維祺爲安南國王賜鍍金駝鈕銀印六年維祺奪都統使莫元清高平地元清奔雲南上疏陳訴帝命安置南甯維祺亦上疏言興兵復讐本末初明正德十一年社堂燒香官陳嵩殺其王莫睭自立睭臣都力士莫登庸討殺嵩立睭兒子諱嘉靖元年登庸逐諱自立諱子黎平據清華自爲一國後莫氏漸衰但保高平一郡勢益弱至是帝遣內院侍讀李仙根兵部主事楊兆傑齎敕諭維祺將高平土地人民歸莫元清各守其土盡爾藩職初安南定爲三年一貢七年維祺疏請六年兩貢並進帝如所請八年使臣李仙根等齎回維祺覆疏言遵旨將高平府石林廣原上琅下琅土地人民歸莫元清因奏稱黎維祺所歸土地尙有保樂七源二州崑崙金馬等十二總社未還請再敕諭全還帝不許是年黎維祺薨弟維錠權理國事十三年正月維錠以訃告遣陪臣胡士揚等進康熙八年十一年歲貢疏言先王世守安南爲逆臣莫登庸篡弑賴

輔政鄭樞之祖剿除恢復莫逆遺孽纂據高平乍臣乍叛至莫元清懼臣討罪潛入內地投誠康熙八年奉命令還高平臣維禧欽奉君命敢不懷遵但莫元清爲臣不共之讐高平爲世守之土叛逆竊據禍在蕭牆叩懇天恩仍令高平屬歸本國且莫元清尙有誓辭及祭伊父莫敬耀文內有圖逆天朝之語今謹敬呈並貢方物事下部議尋議前維禧退還莫元清高平取有復相和好印結今維禧雖言收得誓書祭文但此文年久誓辭係莫敬耀名或得自敬耀存時或得自元清今日殊難懸擬應飭維禧查明具題再議從之十四年黎維禔卒弟維正權理國事十六年帝諭維正曰逆賊吳三桂值明季闖賊之變委身從賊以父死賊手窮竄來歸念其投誠錫之王爵方且感恩圖報殫竭忠誠詎意以梟獍之資懷狙詐之計陰謀不軌自啟釁端藉請搬移輒行叛逆煽惑奸宄塗炭生靈朕連年遣兵征討秦隴底定閩粵盪平惟吳三桂竊據一隅苟延旦夕今大兵雲集恐其挺走潛竄嶺南茲以王累世屏藩効忠天國亂臣賊子諒切同仇今已遣諸軍大張撻伐平定粵西進取滇黔爾國壤地相屬素諳形勢

王其遴選將士協力殲除懋賞榮褒朝有令典欽哉無負朕命十八年十一月維正慶賀大捷疏言逆賊吳三桂變亂數年阻臣貢路且再三脅誘迫令服從區區愚忠罔敢易節乃有逆臣莫元清與三桂密相締結潛入高平圖爲掩襲今願仗天威追禽逆黨明正其罪以固屏藩許之二十一年九月維正遣陪臣甲全等表賀閩粵肅清並進歲貢方物又爲故王維禔請卹議卹如例時所貢金銀器皿與本內不符詔免深求其餘貢物酌減白絹降眞香中黑線香等物二十二年四月遣翰林院侍讀明圖翰林院編修孫卓冊封黎維正爲安南國王御書忠孝守邦四字賜之同時遣翰林院侍讀卹黑禮部郎中周燦諭祭故王維禔維禔時莫元清已故其弟敬光爲黎氏所敗率衆來奔帝命發回安南尋敬光病沒泗城土府莫氏遂絕二十五年增賜安南國王表裏五十著爲例三十六年維正奏言牛馬蝴蝶浦園三處爲鄰界土司侵佔請給還帝問雲南巡撫石文晟知其地屬開化府已三十餘年並非安南故地移文責之五十七年十月黎維正薨嗣子維禔以訃告請襲封附貢方物五十八年二月遣內閣

中書鄧廷詰翰林院編修成文諭祭故王黎維正兼冊封維禡爲安南國王雍正二年維禡遣陪臣表賀登極附貢方物賜御書日南世祚四字三年雲南總督高其倬奏言雲南開化府與安南接界自開化府馬伯汎外四十里至鉛廠山下小河內有逢春里六寨冊載秋糧十二石零康熙二十八年入於安南又雲南通志載自開化府文山縣南二百四十里至賭咒河與安南爲界今自開化府至現在之馬伯汎止一百二十里即至鉛廠山下小河亦止一百六十里是鉛廠山小河外尙有八十里內設都龍南丹兩廠爲雲南舊境雖失在前明但封疆所係均應一併清查委勘立界帝諭都龍南丹等處明季已入安南是侵佔非始於我朝安南入我朝以來累世恭順不宜與爭尺寸之地維禡尋疏辯關總督鄂爾泰疏請於鉛廠山下小河離馬伯汎四十里立界維禡復激詞陳訴五年諭維禡曰朕統馭寰區凡茲臣庶之邦莫非吾土何必較論此區區四十里之地但分疆定界政所當先侯甸要荒事同一體今遠藩蒙古奉諭之下莫不欽承豈爾國素稱禮義之邦獨逆越於德化之外哉王不必以侵佔內

地爲嫌爭爭申辯此乃前人之誤非王之過也王惟祇遵諭旨朕不深求僞意或迴回失前恭順則自取咎戾懷遠之仁矣豈能倖邀王其祇哉無替朕命維禡咸悔奏謝帝因以馬伯汎外四十里賜維禡仍以馬伯汎之小賭咒河爲界六年三月遣副都御史杭奕祿內閣學士任蘭枝往安南宣諭略云王今自悔執迷情詞恭謹朕特沛殊恩即將馬伯汎外四十里之地仍賜國王世守之尋諭鄂爾泰曰朕既加恩外藩亦當俯從民便此四十里內人民若有願遷內地者可給資安插滇省毋使失所其願居外藩屬安南管轄者亦聽其便十一年十一月黎維禡薨王嗣子維祜以訃告請襲封附貢方物十二年二月遣翰林院侍讀春山兵科給事中李學裕諭祭故王維禡冊封維祜爲安南國王十三年黎維祜薨弟維禡權理國事乾隆二年維禡以訃告請襲封遣翰林院侍讀嵩壽修撰陳倓諭祭故王維祜冊封維禡爲安南國王三年九月維禡遣使奉表賀登極並貢方物九年九月兩廣總督馬爾泰奏粵西奸民葉葵私出外夷誘教爲匪安南饑民流入甯明諸處帝命滇粵界接安南關隘嚴行稽查毋釀

事端嗣兩廣總督馬爾泰廣西署撫托庸提督豆斌奏言南甯府屬遷隆土筒之板蒙等隘太平府屬恩陵土州之叫荒等隘鎮南府屬下雷土州之下首等隘共三十餘口岸俱逼近安南宜疊石建柵添卡撥兵各土司帶領土勇扼險守巡并飭地方官每年冬月查修通報安南驅驢地方爲貨物聚集之所最與由隘相近從由隘出入向設閉禁開之實便商民應設客長稽商民往來並責地方官慎察查至平而水口兩關通太源牧馬等地宜設立鐵鍊橫江攔截逢五十日開一面以通商從之初廣西思陵州沿邊與安南接壤巡撫舒輅請裁竹以杜私越憑祥思陵土目有乘機侵安南地者交人不甘恆與爭鬭十六年總督蘇昌奏聞帝諭舒輅下部察議安南猛匪盤道鉗鄧成玉等謀亂造黃袍黃旗木印勾結內地民夷何聖烈等散割招匪謀攻都龍安北宜經等處爲安南兵目偵知獲何聖烈等盤道鉗等竄匿山箐間十九年安南八寶河沙目黃國珍誘獲盤道鉗鄧成玉雲貴總督碩色訊得實奏聞正法初廣東土匪李文光與順化土豪阮姓謀踞祿賴桐坵等處爲亂番官捕獲繫諸獄二十一年械



送李文光十六人於福建閩浙總督喀爾吉善奏言安南僻處蠻陬不敢將李文光擅自加誅送歸請示足徵懷服之忱應將李文光等照交結外國例分別處治從之二十二年六月安南番船失風飄泊永甯汛撥兵守護給資送歸並收貯其軍械歸時給還帝諭收械貯庫殊爲非體可頒諭沿海提鎮知之二十五年閩浙總督愛必達奏言安南邊境沙匪與交目蘇由爲難闌入漫卓馬鹿二寨搶掠滋事已咨其國王禽解矣帝以平日巡防不嚴臨時追捕不力切責之二十六年黎維禕薨王嗣子維禡以訃告請襲封遣翰林院侍讀德保大理寺少卿顧汝修諭祭故王維禡冊封維禡爲安南國王維禡欲以彼國五拜事天之禮受封德保等執不可隨如儀禮成顧汝修旣出境以安南王送迎儀節未周遣書責之廣西巡撫熊學鵬以聞汝修坐革職二十七年三月帝諭禮臣曰安南世爲屬國凡遇朝使冊封至其國自應遵行三跪九叩頭禮乃國王狃於小邦陋見與冊使商論拜跪儀注德保顧汝修指示成例始終恪遵外藩不諳體制部臣應預行宣示嗣後遇安南冊封等事卽將應行典禮並前後遵行

拜跪儀節告知正副使令其永遠遵循著爲令三十四年安南莫氏後黃公纘居南掌猛天寨黎氏逼之率屬內投維禰請索回處治移檄責之四十三年安南解竄匪入關賜維禰緞匹四十六年維禰遣使謝恩貢方物帝命收受下次正貢<sup>一</sup>一半並命嗣後陳謝表奏毋庸備禮五月諭禮部本年安南國貢使到京命堂官一人帶往熱河瞻覲四十九年帝南巡安南陪臣黃仲政黎有容阮堂等迎覲南城外賜幣帛有差特賜國王南交屏翰扁額五十一年安南阮氏變作初明嘉靖中安南王黎維潭復國實其臣鄭氏阮氏之力自是世爲左右輔政後右輔政乘阮死幼孤兼攝左輔政以專國事而出阮氏於順化號廣南王阮鄭世仇構兵及黎維禰權益下移僅同守府輔政鄭棟遂殺世子據金印謀篡國而忌廣南之強乃誘其土酋阮岳阮惠共攻廣南王滅之於富春阮惠自爲泰德王鄭棟自爲鄭靖王兩不相下維禰無如何也安南所都曰東京即古交州唐安南都護治所而以廣南順化二道爲西京即古日南九真地黎維潭起兵之所與東京中隔海口世爲廣南阮氏所據兵強於安南至是鄭棟

死阮惠以鄭姓專國人心不附乃藉除鄭氏爲名攻破黎城擊滅鄭棟之子鄭宗阮氏復專國維禰犒以兩郡且娶以女五十一年維禰卒嗣孫維祁立阮惠盡取象載珍寶歸廣南使鄭氏之臣貢整留鎮都城貢整思扶黎拒阮乃以王命率兵奪回象五十而阮岳亦於廣南要奪其輜重阮惠歸治城池於富春使其將阮任以兵數萬攻貢整於國都整戰死維祁出亡阮任遂據東京四守險要有自王之志五十三年夏阮惠復以兵誅阮任於東京而請維祁復位維祁知其叵測不敢出惠知民心不附盡毀王宮挾子女玉帛舟回富春留兵三千守東京有高平府督阮輝宿者護維祁母妻宗族二百口由高平登舟遠遁至博淦溪河廣西太平府龍州邊也冒死涉水登北岸其不及渡河者盡爲追兵所殺兩廣總督孫士毅廣西巡撫孫永清先後以聞且言推固予奪惟上所命帝以黎氏守藩奉貢百有餘年宜出帥問罪以興滅繼絕先置其家於南甯遣其陪臣黎佃阮廷枚回國密報嗣孫時安南疆域東距海西接老撾南與占城隔一海口北連廣西雲南有二十二府其二府爲土司所居實止二十府共十

分三道此時未陷者清華道四府十五縣宣光道三州一縣興化道十州二縣又上路未陷下路已陷者安邦道四府十二縣山西道五府二十四縣京北道四府二十縣太源道三州八縣其上路已陷下路未陷者山南道九府三十六縣海陽道四府十九縣惟廣南順化二道本阮曾巢穴又據高平道一府四州諒山道一府七縣以捍遏內地帝命孫士毅移檄安南諸路示以順逆早反正時維祁弟維祉維祉皆外出避難維祉死宣光城維祉由京北波篷廠來投孫士毅以維祉有才氣欲令權攝國事帝慮其兄弟日後嫌疑不許乃令土田州岑宜棟護維祉出口號召義兵會阮廷枚等以嗣孫復書至乞轉奏於是安南國土司及未陷各州官兵爭縛偽黨獻地圖而關外各廠義勇亦皆乞餉團練請爲嚮導時阮惠兄弟亦叩關請貢以其國臣民表至言黎維祁不知存亡請立故王維禎之子翁皇司維禎主國事並迎其母妃回國帝知阮惠欺維禎愚儒易與狡計緩師命孫士毅嚴斥之安南進兵路三一出廣西鎮南關爲正道一由廣東欽州泛海過烏雷山至安南海東府爲唐以前舟師之道一由雲南

蒙自縣蓮花灘陸行至安南之洮江乃明沐成出師之道孫士毅及提督許世亨率兩廣兵一萬出關以八千直擣王京以二千駐諒山爲聲援其雲南提督烏大經以兵八千取道開化府之馬白關踰賭咒河入交趾界千有百里而至宣化鎮較沐晟舊路稍近雲貴總督富綱請行帝以一軍不可二帥命駐關外都龍督餉連十月末粵師出鎮南關詔以安南亂後勞瘁不堪供億連餉由內地滇粵兩路設臺站七十餘所所過秋毫無犯孫士毅許世亨由諒山分路進總兵尙維昇副將慶成率廣西兵總兵張朝龍李化龍率廣東兵時土兵義勇皆隨行聲言大兵數十萬各守隘賊望風奔遁惟扼三江之險以拒十一月十三日尙維昇慶成率兵千餘五鼓抵壽昌江賊退保南岸我兵乘之浮橋斷皆超筏直上時天大霧賊自相格殺我兵遂盡渡大破之張朝龍亦破賊柱石十五日進兵市球江江闊且南岸依山高於北岸賊據險列礮我兵不能結筏諸軍以江勢繚曲賊望不及遠乃陽運竹木造浮橋示必渡而潛兵二千於上游二十里溜緩處用小舟宵濟十七日乘筏薄岸相持適上游兵已繞出其背乘

高大呼下擊聲震山谷賊不知王師何自降皆驚潰十九日薄富良江江在國門外賊盡伐沿江竹木斂舟對岸然遙望賊陣不整知其衆無固志乃覓遠岸小舟載兵百餘夜至江復奪小舟三十餘更番渡兵二千分擣賊營賊昏夜不辨多寡大潰焚其十餘艘獲總兵侯伯數十黎明大軍畢濟黎氏宗族百姓出迎伏道左孫士毅許世亨入城宣慰而出城瓊土壘高不數尺上植叢竹內有甌城二則國王所居宮室已蕩盡矣而黎維祁匿民村是夜二鼓始出詣營見孫士毅九頓首謝捷聞初王師之出也帝慮事成後冊封往返稽時致王師久暴露於外先命禮部鑄印內閣撰冊郵寄軍前孫士毅遂以二十二日宣詔冊封黎維祁爲安南國王並馳報孫永清歸其家屬維祁表謝請於乾隆五十五年詣京祝八旬萬壽帝命侯安南全定維祁能自立許來朝是役也乘思黎舊民與各廠義勇先驅嚮導又許世亨張朝龍等新自臺灣立功皆善戰之將故得以兵萬餘長驅深入不匝月而復其都時雲南烏大經之兵尙未至也詔封孫士毅一等謀勇公許世亨一等子諸將士賞賚有差時阮惠已遁歸富春孫

士毅謀造船追討孫永清奏言廣南距黎都又二千里用兵萬人設糧站需運夫十萬與鎮南關至黎城等帝以安南殘破空虛且黎氏累世孱弱其興廢未必非運數也既道遠餉艱無曠日老師代其搜捕之理詔卽班師入關而孫士毅貪俘阮爲功師不卽班又輕敵不設備散遣土軍義勇懸軍黎城月餘阮氏諜知虛實歲暮傾巢出襲國都僞爲來降者士毅等信其誑詞晏然不知也五十四年正月朔軍中置酒張樂夜忽報阮兵大至始倉皇禦敵賊以象載大礮衝我軍衆寡不敵黑夜中自相蹂躪黎維祁挈家先遁演師聞礮聲亦退走孫士毅奪渡富良江卽斬浮橋斷後由是在岸之軍提督許世亨總兵張朝龍官兵夫役萬餘皆擠溺死時士毅走回鎮南盡焚棄關外糧械數十萬士馬還者不及半其雲南之師以黎臣黃文通嚮導得全返黎維祁母子復來投奏聞帝以士毅不早班師而又漫無籌備致挫國威扣將士乃褫職來京待罪以福康安代之阮惠自知賈禍既懼王師再討又方與暹羅構兵恐暹羅之乘其後也於是叩關謝罪乞降改名阮光平遣其兄子光顯齎表入貢懇賜封號略言守

廣南已九世與安南敵國非君臣且蠻觸自爭非敢抗中國請來年親覲京師  
並於國內爲死綏將士築壇建廟請頒官銜設號立主奉祀又聞暹羅貢使將  
入京恐受其媒孽乞天朝勿聽其言福康安先後以聞帝以維祔再棄其國並  
冊印不能守是天厭黎氏不能自存而阮光平旣請親覲非前代莫黎僅貢代  
自金人之比且安南自五季以來曲矯吳丁李陳黎莫互相吞噬前代曾郡縣  
其地反側無常時憂南顧乃允其請即封阮光平爲安南國王冊曰朕惟王化  
遐覃伐罪因而舍服侯封恪守事大所以畏天鑒誠惻於荒陬賁其既往沛恩  
膏於屬國嘉與維新賁茲寵命之頒勛以訓行之率惟安南地居炎徼開十三  
道之封疆而黎民臣事天朝修百餘年之職貢每越王會舊附方輿自遭難以  
流離遂式微而控懇方謂興師復國字小堪與圖存何期棄印委城積弱仍歸  
失守殆天心厭其薄德致世祚訖於終淪爾阮光平起自西山界斯南服向匪  
君臣之分寢成婚媾之仇數啟交訌情殊負固抗顏行於倉卒雖無心而難掩  
前愆悔罪咎以湔除願革面而自深痛艾表箋籲請使先猶子以抒忱琛獻愷



來躬與明年之祝嘏自非仰邀封爵榮藉龍光曷由下蒞民氓安茲鳩集況王者無分民詎在版章其土字而生人有司牧是宜輯寧爾邦家爰布寵綬俾憑鎮撫今封爾爲安南國王錫之新印於戲有興有廢天子惟順天而行無貳無虞國王咸舉國以聽王其懋將丹款肅矢冰兢固圉以長其子孫勿使遏滋他族悉心以勤於夙夜罔令逸欲有邦益敬奉夫明威庶永承夫渥典欽哉母替朕命其黎維祁賞三品銜令同屬下人戶來京歸入漢軍旗下即以維祁爲佐領又令阮光平訪問維祁親屬護送進關其前安插內地之西南夷人有繫懷故土者並令阮光平善爲撫綏以示矜全五十五年阮光平來朝祝釐途次封其長子阮光纘爲世子七月入覲熱河山莊班次親王下郡王上賜御製詩章受冠帶歸其實光平使其弟冒名來光平未敢親到也其譌詐如此五十六年擊敗黎維祉及萬象國之師來獻捷帝優賞之五十七年議定安南貢期舊例三年一貢者定爲兩年六年遣使來朝一次者定爲四年九月阮光平在義安病故世子阮光纘權國事以訃告五十八年正月遣廣西按察使成林諭祭加

設忠純並頒賜御製詩於墓道勒碑以表恭順封光纘爲安南國王帝以阮邦新造人心未定阮光纘尙幼且阮岳尙在廣南吳文楚久握兵柄主少國疑恐有變特調福康安總督雲貴備邊並令成林密偵其國成林旋以國事掣定聞乃止八月署兩廣總督郭世勳奏安南添立花山市先是安南通市平而水口兩關商人在其國之高憑鎮牧馬庸立市由隘商人在諒山鎮之驅馳庸立市分設太和豐盛二號並置廠長市長各一人保護監當各一員而從平而關出口之商必由水路先抵花山計程僅二百餘里且花山附近村莊稠密至是添設行鋪其市長監當各員即於驅馳額內派往客民中有由陸路前赴牧馬者仍聽其便嘉慶元年福州將軍魁倫兩廣總督吉慶先後奏言獲烏船船海盜有安南總兵及封爵勅命印信等物初阮氏據廣南以順化港爲門戶與占城真臘暹羅皆接壤西南瀕海有商船飄入海者阮氏輒沒入其貨卽中國商船亦倍稅沒其半故紅毛占臘暹羅諸國商船皆以近廣南灣爲戒阮光平父子既以兵篡國國用虛耗商船不至乃遣烏船船百餘總兵十二人假採辦軍餉

多招中國沿海亡命喚以官爵資以器械船隻使嚮導入寇閩粵江浙各省時  
浙師禦海盜值大風雨雨中有火燕入賊舟悉破損參將李成隆率兵涉水取  
賊礮並搜獲安南勅文總兵銅印各四枚稱差贖隊大統兵進祿侯倫貴利而  
教諭王鳴珂獲三賊一詭爲瘡者一名王貴利訊云即倫貴利也同時閩中獲  
艇賊安南總兵范光喜供述阮光平既代黎氏光平死傳子光續時與舊阮構  
兵而軍費又苦不給其總督陳寶玉招集粵艇肆掠於洋繼而安南總兵黃文  
海與賊官伍存七有隙以二艇投誠於閩今閩中造船用其式也倫貴利者廣  
東澄海人投附安南與舊阮戰有功封侯以巡海私結閩盜來閩浙劫掠安南  
艇七十六艘分前中後支倫貴利統帶後支其銅印凡四貴利自佩其一餘三  
印三總兵曰耀曰南曰金者佩之耀已禽斬南金則均溺斃於海云巡撫阮元  
磔貴利而以供辭入奏帝命軍機大臣字寄兩廣總督照會安南國王冬十二  
月阮光續呈覆略曰小番世蒙天朝恩庇曠格逾涯無能酬報思以慎守疆宇  
永作屏翰祇以本國極南沿海農耐地方有賊渠阮種竊據其地嘯聚齊梟盜

夥數爲海患本國整飭海防間收艚客以離賊黨且助海面帆柁之役倫貴利者前居本國隨同商伴巡防詎料伊包藏禍心私瞞小番竟敢潛約匪船越赴內洋肆行劫掠又擅造印割轉相誑誘情罪重大實爲法律所不容小番不能先燭其奸疏於鈴束仰蒙聖慈普鑒洞悉肫誠訓誨有加天日垂照恭譯聖諭且感且悚謹當遵奉彝訓靖守藩封令本國巡海人員嚴加警飭密施鈴勒斷不容結同匪夥越境作非務期桂海永清以上副聖天子懷柔之至德是所自勉也帝以國王不知赦之二年兩廣總督奏稱安南國王阮光纘差委官弁丁公雪等帶領兵船拿獲盜犯黃柱陳樂等六十餘名解送內地帝降敕褒賜並頒賜如意玉山蟒錦紗器以示優獎初阮光平旣攻滅廣南王阮某阮某爲黎王婿妻黎氏有娠逃於農耐農耐爲水真臘舊都即嘉定省今之西貢也黎氏生子曰阮福映本名種潛匿民間及長奔暹羅暹羅王故與阮光平夙仇乃以女弟婦福映助之兵攻克農耐據之勢漸強號舊阮而稱阮光平父子爲新阮亦曰西阮舊阮以復仇爲辭奪其富春舊都時嘉慶四年也六年十一月安南

僞總兵陳天保携眷內投始知安南與農耐兵爭事七年八月農耐攻昇隆城阮光纘敗走被禽八月阮福映縛送莫觀扶等三名來粵並獻其攻克富春時所獲阮光纘封冊金印奉表投誠莫觀扶等皆中國盜犯受安南招往投順封東海王及總兵僞職者帝以從前阮光平款闕內附恩禮有加阮光纘嗣服南交復頒敕命俾其世守勿替乃數奸窩盜肆毒海洋負恩反噬莫此爲甚且印信名器至重輒行捨棄潛逃罪無可逭其命兩廣總督吉慶赴鎮南關備邊俟阮福映攻復安南全境以聞十二月阮福映滅安南遣使入貢備陳搆兵始末爲先世黎氏復仇并言其國本古越裳之地今兼併安南不忘世守乞以南越名國帝諭以南越所包甚廣今兩廣地皆在其內阮福映全有安南亦不過交趾故地不得以南越名國八年改安南爲越南國六月命廣西按察使齊布森往封阮福映爲越南國王蓋自阮光平篡黎氏十九年復滅於阮福映嗣後修職貢者爲舊阮子孫矣九年遣編置佐領及安插江甯熱河張家口奉天黑龍江伊犁等處安南人回國資銀有差並許黎維祁歸葬十一年越南興化鎮目

請以臨安府所屬六猛地方外附檄諭王自懲之阮光纘遺族阮如權避捕投內地兩廣總督吳熊光奏請發交阮福映帝嫌其爲屬藩裔送通逃不許亦不許其逼留內地十四年阮福映遣員至諒閣齋送乾隆六十年錫封南掌國王敕印帝嘉獎之阮福映之得國也藉嘉定永隆兵力居多乃取二省爲年號曰嘉隆在位十七年而薨子福皎嗣道光元年遣廣西按察使潘恭辰齎敕印往封阮福皎爲越南國王九年越南使臣請改貢道由廣東水路部議駁之十九年帝諭向來越南國二年一貢四年遣使來朝一次合兩貢並進嗣後改爲四年遣使來貢一次其貢物照兩貢並進之數減其半福皎改元明命在位二十一年嘗以兵奪高蠻國河仙一帶地分通境爲三十省曰富春國都也廣南廣義二省爲右圻廣治廣平二省爲左圻平順富安廣和邊和嘉定安江河仙永隆定祥九省爲南圻河靜海陽廣安清化乂安南定廣平興安河內北寧諒山高平太原山西宣光興化十六省爲北圻後又以廣義廣治各省過小改爲道疆域較歷世爲大惟宣光省西北直廣西鎮安府之南有地曰保樂州其酋農

姓係黎氏舊臣仍念故主不服新王越南僅羈縻處之黎維祉子孫逃居老撾深山中時思衆衆復國所謂黎王後也其餘黎氏疏族好滋事俱安置平順以南各省又自鄙其國文教之陋奏請頒發康熙字典其取士則用元制以經義詩賦考試道光二十一年阮福蛟薨遣使告哀詔停進貢方物命廣西按察使寶清往封其子福璇爲越南國王福璇改元紹治在位七年道光二十八年薨子福時嗣凡朝使冊封歷世只在河內河內即東京其國建都處也及阮福映得國以東京屢燬於兵而其先人世居嶺南遂遷都於富春省改東京爲河內省封使至其國仍循例駐節於此阮福時嗣位年幼奏乞天使至其國都由是廣西按察使勞崇光至富春冊封爲三十年鄭祖琛奏越南國王阮福時因先後奉到孝和睿皇后宣宗成皇帝遣詔擬請遣使恭進香禮並進香品祭物又齎遞表文貢物慶賀登極帝諭孝和睿皇后宣宗成皇帝梓宮均已奉移陵寢止其遠來進香其慶賀登極方物亦無庸呈進咸豐二年諭越南國明年例貢著於咸豐二年五月內到京六年諭越南國王阮福時以丁巳年正貢屆期咨

呈勞崇光奏請於何月進關現在用兵諸省分尙未肅清越南國此次例貢著  
緩至下屆兩貢並進八年法蘭西奪取越南國西貢先是明季有法蘭西天主  
教徒布教來安南康熙五十九年法兵艦俄羅地號泊交趾士官三人登陸至  
平順省土人縛而獻之王艦長與教師商以重金贖歸此爲法越交涉之始乾  
隆十四年法王路易十五命皮易甫亞孛爾者爲全權大臣至順化府謀通商  
國王不許乾隆十八年越人大戮天主教徒乾隆五十一年越內亂阮岳自稱  
王阮光平使其子景徽詣法國乞援翌年遂訂法越同盟之約割崑崙島之茶  
麟港於法未幾爽約嘉慶二十五年法艦來越南測量海口國人激王殺法人  
狄亞氏道光二十七年法人以兵艦至茶麟港大敗越軍至是年遂徑奪西貢  
越南第一都會也十年諭內閣劉長佑奏越南國入貢屆期現在廣西軍務未  
竣道路不寧其丁巳辛酉兩屆例貢暫行展緩同治元年法國拿破崙第三以  
海軍大舉伐越南奪茶麟港約割下交趾邊和嘉定定祥三省開通商三口賠  
償二千萬佛郎許其和嘉興省即西貢所在也二年越南國王阮福時因奉到



文宗顯皇帝遺詔咨請遣使進香表賀登極貢方物卻之三年越南乙丑例貢  
及上二屆兩貢仍命展緩六年冬廣西太平鎮安兩府土匪蜂起官軍擊之敗  
遁越南七年國王咨乞廣西巡撫蘇鳳文代奏請兵援剿帝命提督馮子材率  
三十營討之八年七月二十一日華軍山鎮南關進發八月賊酋吳鯤戰北甯  
傷於銃飲孔雀血死諸賊大懼大兵至遂乞降冬賊酋梁天錫西奔宣光投歸  
河陽賊首黃崇英是年法人割取越南國安江河曲永隆三省自是下交趾六  
省悉隸法版九年興化省保勝賊首劉永福太原省蘇街賊首鄧志雄皆來降  
夏四月黃崇英遁入保樂州白苗界內提督馮子材班師七月師次龍州而黃  
崇英復踞河陽劉永福復踞興化之保勝鄧志雄復踞太原之蘇街十月降賊  
蘇國漢乘夜襲陷諒山省城北圻總統段壽死之時廣西候補道徐廷旭因事  
至諒山城外驅驢庸調兵助越攻城不克十一月賊酋阮四陸之平張十一等  
復踞高平省越王復懇出師帝命馮子材再督軍出關廣西巡撫李福泰請以  
廣東候補道華廷傑襄辦軍事十年夏馮子材次龍州四月二十一日總兵劉

王成督諸將出關次北甯九月欽州知州陳某誘禽蘇國漢解送兩廣總督瑞齡誅之其子蘇亞鄧遁入海踞狗頭山道員華廷傑旋回廣東十一年廣西巡撫劉長佑檄道員覃遠璣率勇十營辦太平鎮安二府邊防馮子材亦調回防邊十二年華軍將撤法人突以兵船至河內省國王咨稱華總兵陳得貴派隊押令放入劉長佑據情奏聞朝命革職提訊法人遂招中國散勇及雲南邊境不逞之徒攻越南各省其守臣多降至太原省守臣招劉永福相助法兵至永福設伏敗之禽其帥安鄴法人敗退河內省與王和玉遣其臣阮文祥與議法人遂建館河內並於白藤海口設關收稅初賊首黃崇英爲吳鯤中表劉永福亦吳鯤之黨吳鯤死其弟吳鯨合家自殺黃崇英劉永福素不相能永福降越南王授以三省提督之職黃崇英踞河陽爲盜自若十三年劉長佑遣劉玉成將左軍十營道員趙沃將右軍十營由鎮安府出關討黃崇英是年法人逼令越南王公布天主教及紅河通航二事紅河卽富良江也旋又以保商爲名派兵駐守河內海防諸地且求開採紅河上流礦山光緒元年趙沃連克底定縣

襄安府各處保樂州土民及白苗皆約降崇英率衆來拒旋遁去趙沃督諸軍攻克河陽老巢賊黨陳亞水降七月禽黃崇英戮之二年春班師七年劉長佑移督雲貴知法人志在得越南以窺滇粵上疏略曰邊省者中國之門戶外藩者中國之藩籬藩籬陷則門戶危門戶危則堂室震越南爲滇粵之唇齒泰西諸國自印度及新加坡檳榔嶼設立埠頭以來法國之垂涎越南久矣開市西貢據其要害復通悍賊黃崇英規取東京衆兵謀渡洪江以侵諒山諸處又欲割越南廣西邊界地六百里爲駐兵之所臣時任廣西巡撫雖兵疲餉絀立遣將卒出關往援法人不悅計告通商衙門謂臣包藏禍心有意敗盟賴毅皇帝察臣愚忠乃得出助剿之師內外夾擊越南招用劉永福以折法將沙曾之鋒廣西兩軍左路則提督劉玉成趨太原北甯右路則道員趙沃由興化宣光分擊賊黨直抵安邊河陽破崇英巢穴殲其渠魁故法人寢謀不敢遽肆吞併者將逮一紀然臣每詳詢邊將知法人之志在必得越南以窺滇粵之郊而通楚蜀之路狡焉思敝禍近切膚乃入秋以來法國增加越南水師經費其下議院

議借二百五十萬佛郎經理東京海灣水師其海軍卿格羅愛逐日籌畫東京  
兵事俟突尼斯案一結即可進行竊歎法人果蓄志而潛謀嗜利而背約也竊  
聞造此謀者爲伯朗手般在越南西貢爲巡檢司開埠之後招入土夷客民衆  
至百萬民情漸洽物產日增柬埔寨所招商民亦逾百萬連米出洋歲百萬石  
所徵賦稅入西貢庫藏者歲計佛郎二百五十萬柬埔寨本荒較開成通衢車路  
方軌溝渠修濬柬埔寨人感法恩德至願以六百萬口獻地歸附故伯朗手般以  
越南情形告其總統富良江一帶法已駛船開市議上溯以達瀾滄江通中國  
之貨結樹方諸夷以窺滇粵邊境築西貢至柬埔寨鐵路以避海道之迂繞越  
南四境皆有法人之迹政治不修兵賦不足勢已危如累卵今復興兵吞噬加  
以柬埔寨之叛民勢必摧敗不可支柱同治十三年法提督僅鳴礮示威西三省  
已入於法人之手而紅海通舟地險復失所立條約惟不肯與以東京國勢岌  
岌恃此爲犄角若復失其東京即不窮極兵力圖滅富春已無能自立矣臣以  
爲法人此舉志吞全境既得之後必請立領事於蒙自等處以攘山礦金錫之

利或取道川蜀以通江海據列邦通商口岸之上游況滇南自同治以後平定逆回其餘黨桀黠者或潛竄越南山谷或奔洋埠役於法人軍情虛實邊地情形盡行洩漏故時有夷人闖入滇以觀形勢儻法覆越南逆黨又必導之內寇逞其反噬之謀臣受任邊防密邇外寇不敢聞而不告奏入不報時駐英法使臣曾紀澤以越事迭與法廷辨詰福建巡撫丁日昌亦疏法越事以聞帝命與北洋大臣李鴻章籌商辦法並諭沿江沿海督撫密爲籌辦八年二月法人以兵艦由西貢駛至海陽謀取東京直督張樹聲以聞帝諭滇督相機因應三月移會國荃督兩廣法攻東京破之張樹聲奏令滇粵防軍嚴守城外以剿辦土匪爲名藉圖進步並令廣東兵艦出洋遙爲聲援五月滇督劉長佑遣道員沈壽榕帶兵出境與廣西官軍連絡聲勢保護越南並奏言探聞法人破東京後退駐輪船日日添兵增招羣盜懸賞萬金購劉永福十萬金取保勝州又法領事破城後劫掠商政衙門傳示各商出入貨稅另有新章現仍調取陸軍趕造拖船爲西取保勝之計越王派其兵部侍郎陳廷肅接署河內總督遣吏部尙

書阮正等抵山西與黃佐炎等籌商禦敵之策各省巡撫布按大半與黃佐炎劉永福同願決一死戰嗣後統領防軍提督黃桂蘭報稱劉永福馳赴山西道經諒山來見比曉以忠義感激奮發據稱分兵赴北甯助守保勝萬不使法人得逞但兵力不足望天朝爲援其河內探報云法人恐援兵猝至當釋所獲之河內巡撫交還城池倉庫巡撫不受稱法人違約弄兵以死自誓乃轉交按察使宗室阮霸復以火藥轟燬東京以免越人復聚且省兵力分守其輪船或東下海陽或分駛廣南西貢俟添兵既集從事上游伏查法人焚掠東京狡謀叵測越南諸臣決計主戰山西爲上通雲南要地越軍能悉力抵禦微特滇粵邊防可保即越南大局亦尙有振興之期而粵督與總署所議以滇粵三省兵力合規北圻一策更可乘勢早圖以杜窺伺然越國受制法人已久人心恇怯此次決戰山西期於必勝稍有撓敗則大局不堪設想蓋山西有失則法人西入三江口不獨保勝無復障礙而滇省自河底江以下皆須步步設防益形勞費以事機而論中國有萬難坐視之處且不可待山西有失始爲事後之援旋召

長佑入覲以岑毓英署滇督劉永福者廣西上恩州人咸豐間廣西亂永福率三百人出鎮南關時粵人何均昌據保勝永福逐而去之遂據保勝所部旗皆黑色號黑旗軍永福既立功越南授三省提督職時時自備餉械剿匪而黃佐炎皆匿不上聞越臣亦多忌之永福積怨於佐炎佐炎爲越南駙馬以大學士督師督撫均受節制馮子材爲廣西提督時佐炎以事來見子材坐將臺令以三跪九叩見佐炎銜之次骨越難已深國王阮福憤極決戰責令佐炎督永福出師六調不至法軍忌永福故越王始終倚任之先是劉長佑命藩司唐炯率舊部屯保勝曾國荃至粵命提督黃得勝統兵防欽州提督吳全美率兵輪八艘防北海廣西防軍提督黃桂蘭道員趙沃相繼出關所謂三省合規北圻也時法人要中國會議越事諭滇粵籌畫備議法使寶海至天津命北洋大臣會商越南通商分界事宜吏部主事唐景崧自請赴越南招撫劉永福帝命發雲南岑毓英差遣景崧乃假道越南入滇先至粵謁曾國荃聽其議資之入越見永福爲陳三策上策言越爲法逼亡在旦夕誠因保勝傳檄而定諸省請命中

國假以名義事成則王此上策也次則提全師擊河內驅法人中國必助之餉此中策也如坐守保勝事敗而投中國此下策也永福曰微力不足當上策中策勉爲之三月法軍破南定帝諭廣西布政使徐延旭出關會商黃桂蘭趙沃籌防李鴻章丁憂奪情回北洋大臣任鴻章懇辭至是命鴻章赴廣東督辦越南事宜粵滇桂三省防軍均歸節制鴻章奏擬赴上海統籌全局法使寶海在天津議約久不協奉調回國以參贊謝滿祿代理劉永福與法人戰於河內之紙橋大破法軍陣斬法將李成利越王封永福一等男徐延旭奏留唐景崧防營效用並陳永福戰績帝促李鴻章回北洋大臣任並詢法使脫利古至滬狀令鴻章定期會議脫利古詢鴻章是否助越鴻章仍以邊界剿匪爲辭而法兵已轉攻順化國都迫其議約鴻章與法新使德理議不就法兵聲言犯粵廣東戒嚴總署致法使書言越南久列藩封歷經中國用兵剿匪力爲保護今法人侵陵無已豈能蔑視倘竟侵我軍駐紮之地惟有決戰不能坐視帝諭徐延旭飭劉永福相機規復河內法軍如犯北甯卽令接戰命滇督增兵防邊唐炯迅



赴前敵備戰並濟永福軍餉旋命岑毓英出關督師法兵破越之山西省粵勢愈急以彭玉麟爲欽差大臣督粵師彭玉麟奏法人逼越南立約欲中國不預紅河南界之地及許在雲南蒙自縣通商顯係圖我滇疆冀專五金之利不特滇粵邊境不能解嚴即廣東天津亦須嚴備時越南王阮福時薨無子以堂弟嗣法人乘越新喪以兵輪攻順化海口入據都城越南嗣君在位一月輔政阮說啟太妃廢之改立阮福昇至是乞降於法立約二十七條其第一條即言中國不得干預越南事此外政權利權均歸法人逼王諭諸將退兵重在逐劉永福也滇撫唐炯屢促永福退兵永福欲退駐保勝黑旗將士皆憤怒副將黃守忠言公可退保勝請以全軍相付守山西有功公居之罪歸末將永福遂不復言退徐延旭奏言越人倉卒議和有謂因故君未葬權顧目前者有謂因廢立之嫌疑臣植黨構禍者迭接越臣黃佐炎等鈔寄和約越誠無以保社稷中國又何以固藩籬越臣輒以俟葬故君即行翻案爲詞請無撤兵劉永福仍駐守山西嗣王阮福昇嗣位具稟告哀並懇準其遣使詣闕乞封越國人心渙散能

否自立尙未可知並將法越和約二十七款及越臣黃佐炎來稟錄送軍機處  
兩江總督左宗棠請飭前藩司王德榜募勇赴桂邊扼紮十一月法人破興安  
省拘巡撫布政按察至河內鎗斃之進攻山西破之劉團潰永福退守興化城  
十二月嗣王阮福昇暴卒或云畏法逼自裁國人立前王阮福時第三繼子爲  
王輔政阮說之子也徐延旭奏報山西失守北甯斷無他虞帝責其誇張十年  
唐景崧在保勝上樞府書言滇桂兩軍偶通文報爲日甚遲聲勢實不易連絡  
越南半載之內三易嗣君臣庶皇皇類於無主欲培其根本以靖亂源莫如遣  
師直入順化扶翼其君以定人心而清匪黨敵愾庶幾稍戢軍事亦易於措手  
若不爲藩服計北圻沿邊各省我不妨直取以免坐失外人否則首鼠兩端未  
有不歸於敗者也劉永福謁岑毓英於家諭關毓英極優禮之編其軍爲十二  
營法軍將攻北甯毓英遣景崧率永福全軍赴援桂軍黃桂蘭趙沃方守北甯  
山西之圍桂蘭等坐視不救永福憾之深景崧力解之乃赴援景崧勸桂蘭離  
城擇隘而守桂蘭不從二月法兵攻扶良總兵陳得貴乞援北甯師至扶良已

潰法兵進逼北甯黃桂蘭趙沃敗奔太原劉永福亦坐視不救徐延旭老病與趙沃有舊偏信之趙沃庸懦其將黨敏宣奸欺蔽延旭敵犯北甯敏宣先遁陳得貴爲馮子材舊部驍勇善戰子材曾劾延旭延旭怨之并怨得貴及北甯陷乃奏戮之敏宣亦正法延旭調度失宜帝命革職留任三月命湖南巡撫潘鼎新辦廣西關外軍務接統徐延旭軍黃桂蘭懼罪仰藥死帝諭徐延旭株守諒山僅令提督黃桂蘭道員趙沃駐守北甯遇敵先潰殊堪痛恨徐延旭革職拿問黃桂蘭趙沃潰敗情形交潘鼎新查辦以王德榜署廣西提督德榜辭不拜唐炯革職拿問以張凱嵩爲雲南巡撫北甯敗後徐延旭以唐景崧護軍收集敗殘申明約束時唐仁廉署廣西提督法軍由北甯進據興化別以兵艦八艘駛入中國海窺廈門及上海吳淞口沿海戒嚴於是中法和議起四月李鴻章與法總兵福祿諾在天津商訂條款諭滇桂防軍候旨進止鴻章旋以和約五款入告大略言中國南界毗連北圻法國任保護不虞侵佔中國應許於毗連北圻之邊界法越貨物聽其運銷將來法與越改約決不插入傷中國體面之

語朝旨報可予鴻章全權畫押既而法公使以簡明條約法文與漢文不符相詰帝責鴻章辦理含混輿論均集矢鴻章指爲通夷法使既藉端廢約帝令關外整軍嚴防若彼竟求犯即與交綏命岑毓英招劉永福率所部來歸潘鼎新奏法兵分路圍犯谷松屯梅二處桂軍械缺糧乏恐不可恃帝以其飾卸責之法兵欲巡視諒山抵觀音橋桂軍止之令勿入法將語無狀遂互擊勝之奏入諭進規北甯責法使先行開礮應認償令告法外部止法兵並諭我軍如彼不來犯不宜前進法使續請和議帝諭桂軍回諒山滇軍回保勝不得輕開釁法將孤拔欲以兵艦擾海疆法使巴德逗留上海不肯赴津乃改派曾國荃全權大臣陳寶琛會辦邵友濂劉麟祥隨同辦理諭言兵費卹款萬不能允越南須照舊封貢劉永福一軍如彼提及須由我措置分界應於關外空地作爲甌脫雲南通商應在保勝不得逾值百抽五六月法將孤拔以兵艦八艘窺閩海欲踞地爲質挾中國議約何璟張佩綸以聞法艦攻臺灣之基隆礮臺臺撫劉銘傳拒守曾國荃陳寶琛與法使議約於上海國荃許給撫卹費五十萬奉旨中

斥約議久不就乃一意主戰諭岑毓英令劉永福先行進兵規復北圻岑毓英  
潘鼎新關內各軍陸續進發以法人失和不告各國七月法公使謝滿祿下旗  
出京帝乃宣諭曰越南爲我封貢之國二百餘年載在史冊中外咸知法人先  
據南圻各省旋又進據河內戮其人民利其土地奪其賦稅越南閭閻私與立  
約並未奏聞挽回無及越亦有罪是以姑與包涵不加詰問光緒八年法使寶  
海在天津與李鴻章議約三條當與總理各國事務衙門會商妥籌法人又撤  
使翻覆越之山西北寧等省爲我軍駐紮之地清查越匪保護屬藩與法國絕  
不相涉本年二月間法兵竟來撲犯當經降旨宣示正擬派員進取忽據伊國  
總兵福祿諾先向中國議和其時法國因埃及之事岌岌可危中國明知其勢  
處迫逼本可峻詞拒絕而仍示以大度許其行成特命李鴻章與議簡明條約  
五款互相畫押諒山保勝等軍應照議於定約三月後調回迭經諭飭各防軍  
扼紮原處不準輕動開釁諸軍將士奉令維謹乃法國不遵定約忽於閏五月初  
一初二等日以巡邊爲名直撲諒山防營先行開礮轟擊我軍始與之接仗

互有殺傷法人違背條約無端開釁傷我官兵本應以干戈從事因念訂約通好二十餘年亦不必因此盡棄前盟仍準各國總理事務衙門與在京法使往返照會情喻理曉至再至三閏五月二十四日復明降諭旨照約撤兵昭示大信所以保全和局者實屬仁至義盡法人乃竟始終怙飾橫索兵費恣意要挾輒於六月十五日佔據臺北基隆山礮臺經劉銘傳迎剿獲勝本月初三日何璟等甫接本領事照會開戰而法兵已自馬尾先期攻擊傷壞兵商各船雖經官軍焚燬法船擊壞雷艇並陣斃法國兵官尙未大加懲創若再曲予含容何以伸公論而順人心用特揭其無理情節布告天下八月諭岑毓英督飭劉永福及在防各營規復北圻並諭潘鼎新飭各軍聯絡聲勢分路並進提督蘇元春與法軍戰於陸岸縣敗之十月內閣學士周德潤奏官軍進取越南宜以正兵牽制河內之師別用奇兵由車里趨老撾走哀牢以暗襲順化募用滇邊土人必能得力得旨交滇督詳察籌辦是月蘇元春與法人戰於紙作社陣斬法兵官四人十一月王德榜軍大敗於豐谷蘇元春不往援唐景崧與劉永福丁

槐軍攻宣光力戰大捷優詔褒之十二月十九日法兵攻谷松王德榜以豐谷之敗怨蘇軍不救至是亦不往援蘇軍敗退威坡諒山戒嚴帝命馮子材幫辦廣西關外軍務二十九日法軍攻諒山據之潘鼎新等退駐鎮南關龍州大震唐景崧劉永福丁槐攻宣光月餘不能下諒山失守岑毓英唐景崧等軍斷後援令勿拚孤注景崧不可馮子材與法軍戰於文淵互有殺傷十一年正月初九日法兵攻鎮南關轟毀關門而去提督楊玉科戰歿潘鼎新退駐海村帝命戴罪立功元春退駐幕府王德榜自負湘中宿將屢催援不至鼎新効之落職所部歸元春轄法軍攻劉永福於宣光永福軍潰唐景崧退駐牧馬欽廉防急彭玉麟請調馮子材軍防粵朝旨令鼎新議鼎新素不協於子材乃命子材行子材以關外防緊不肯退玉麟乃令專顧桂防鼎新師久無功褫職以李秉衡護理廣西巡撫蘇元春督辦廣西軍務法兵既毀鎮南關逃軍難民蔽江而下廣西全省大震子材至乃力爲安輯子材久駐粵西素有威惠桂越民懷之心始定乃於關內十里之關前隘跨東西兩嶺間築長牆三里餘外掘深塹爲

扼守計自率所部駐之而令王孝祺勒軍屯其後爲犄角法兵揚言某日犯關子材逆料其必先期至乃議先發制敵鼎新止之子材力爭徑率王孝祺軍夜犯敵壘殺敵甚多法起諒山之衆撲鎮南關子材誓衆曰法再入關吾有何面目見粵人必死拒之士氣皆憤法攻長牆急礮猛烈子材勒諸統將屹立接戰遇退後者手刃之戰酣子材自開壁率兩子相榮相華直衝敵軍諸軍以子材年七十舊身陷敵皆感憤殊死戰王孝祺陳嘉率部將潘瀛張春發等隨其後王德榜軍旁至夾擊之斃法兵無算鏖戰兩日法軍子彈盡大敗潰遁子材率兵攻文淵法軍棄城走諸軍三路攻諒山孝祺德榜戰尤力連戰皆捷二月十三日遂克諒山法悉衆遁子材進軍克拉木逼攻郎甲王孝祺進軍貴門關盡復昔年所駐邊地越民立忠義五大團二萬餘人皆建馮軍旗幟西貢亦聞風通款自海通以來中國與外國戰惟是役大捷子材之功也法兵六千犯臨洮府復分兩隊一北趨珂嶺安平一南趨緬旺猛羅演督岑毓英命岑毓寶李應珍等扼北路王文山扼南路而自率軍當中路皆有斬獲法軍遂合趨臨洮府



滇軍拒戰南北路迴軍夾攻之陣斬法將五人法軍大潰時法兵艦據臺灣之澎湖諒山既大捷法人力介英人赫德向李鴻章議和言法人交還基隆澎湖彼此撤兵不索兵費鴻章奏言澎湖既失臺灣必不可保當藉諒山一勝之威與締和約則法不至再事要求朝廷納其議立命停戰臨洮之戰乃在停戰後電諭未達前也鴻章遽請簽約令諸將皆退還邊界將士扼腕痛憤不肯退彭玉麟張之洞屢電力爭帝以津約斷難失信嚴諭遵辦法人要求逐劉永福於越南張之洞乃擬令永福駐思欽永福堅不肯行唐景崧危詞脅之朝旨嚴切乃勉歸於粵授總兵馮子材奉督辦廉欽邊防之命約既成越南遂歸法國保護焉

清史稿

屬國傳三

緬甸

暹羅

南掌

蘇祿

緬甸在雲南永昌府騰越廳邊外而順寧普洱諸邊皆與緬甸界順治十八年李定國挾明桂王朱由榔入緬詔公愛星阿偕吳三桂以兵萬八千人臨之李定國走孟艮不食死緬酋莽應時縛由榔以獻遂班師緬自是不通中國者六十七年雍正九年緬與景邁交關景邁使至普洱求貢乞祝南掌暹羅雲貴總督鄂爾泰疑而卻之緬密遣人至車里士司探知景邁貢被卻則大喜揚言緬來歲亦入貢旋興兵二萬攻景邁而貢竟不至緬地互數千里其酋居阿瓦城城西瀕大金沙江江發源野人番地縱貫其國中南注於海沿海富魚鹽緬人

載之溯江上行十餘日抵老官屯新街蠻暮市邊內外諸夷人皆賴之而江以東爲孟密有寶井產寶石又有波龍者產銀江西湖廣及雲南大理永昌人出邊商販者甚衆且屯聚波龍以開銀鑛爲生常不下數萬人自波龍迤東有茂隆廠亦產銀乾隆十年葫蘆酋長以廠獻遂爲內地屬然其地與緬犬牙相錯十八年廠長吳尙賢思挾緬自重說緬入貢緬酋麻哈祖乃以馴象塗金塔遣使叩關雲南布政司等議卻之而巡撫圖爾炳阿遽以聞帝下禮部議如他屬國入貢例其冬緬使還至順甯聞自古部酋撒翁起兵攻緬緬兵敗麻哈祖逃至約提朗爲自古所得沈之江撒翁據阿瓦五年而緬屬之木梳頭目甕藉牙復起兵攻走自古自據其地令頭目播定鮓等以兵脅諸部役屬之旣而甕藉牙死子憎洛立未幾亦死弟憎駁立貴家者隨永明入緬之官族也其子孫自相署曰貴家據波龍廠採銀其酋宮裏雁不附於甕藉牙約木邦酋攻之兵敗逃入孟連而孟連土司刀派春奪其孥賄爲宮酋妻囊占所襲殺雲貴總督吳達善誘宮裏雁至則坐以撥邊罪肆諸市而木邦酋罕莽底亦兵敗走死憎

駁立其弟罕黑由是緬人益無忌明萬歷時巡撫陳用賓因永昌府近緬設八關控之八關者萬仞巨石神護銅壁鐵壁虎踞天馬漢龍也其是八關皆無險阨可守山箐間小徑往往通人行自永昌迤邐而南爲順甯又南爲普洱其邊袤互蓋二千餘里永昌之盡達蘭川猛卯芒市遮放順甯之孟定孟連耿馬普洱之車里數土司外又有波龍養子野人根都狚獠濮夷雜錯而居非緬類然多役於緬土司亦稍致餽遺謂之花馬禮由來久矣暨緬人內訌禮遂廢甕藉牙父子欲復其舊諸土司弗應乃遣兵擾其地而普洱獨先有事二十八年劉藻爲雲南巡撫額爾格圖爲提督是年冬緬人先遣刀派先之兄刀派新自阿瓦還至孟連徵索幣貨又遣頭目卜布拉木邦罕黑至耿馬責其禮普洱之三板納者本車里土司地雍正七年鄂爾泰總督雲南招降之始割其地置府至是緬人亦來索米永順鎮總兵田允中普洱鎮總兵劉德成知府達成阿檄土司各率兵禦之殺其頭目卜布拉召罕標等餘衆潰走孟艮本緬屬距普洱千餘里土司召孟容與弟召孟必不相能召孟必之子召散譜召孟容於緬緬

人執之其子召丙走南掌尋入居於十三板納之孟遮召散因令素領散聽素領散撰素領黨阿烏弄等犯打樂分侵九龍江橄欖壩車里土司遁去賊入據其城總督劉藻檄大理順甯營兵七千往勦遊擊司邦直先進爲賊人所圍會參將劉明智至夾攻破之乘勝復車里土司城進攻猛籠猛歇猛混猛遮諸壘連破之然賊往往竄伏屯聚未肯即退藻議益以曲尋楚姚兵二千未至而參將何瓊詔遊擊明浩等聞猛阿爲賊所攻遽率兵過滾弄江束器械以行不設備入山遇賊兵敗皆論斬時乾隆三十年也三十一年正月詔大學士楊應琚自陝甘移督雲南降劉藻湖北巡撫藻自刎死是月己亥應琚至雲南楚姚鎮總兵華封已平打樂猛臘參將哈國興已平大猛養合勦孟艮召散遁官軍得其城而劉得成與提督達啟及參將孫爾桂攻整欠亦克之普洱邊外悉平叭先捧者車里土司之所屬蓋徼者也顧與其妻咸以從軍自効斬素領散撰於小猛崙素領散聽亦爲其妻殺死應琚乃請以召丙居孟艮叭先捧居整欠均授以指揮使守其地時提督李勳方至雲南應琚令往孟艮整欠正經界定賦

稅附入版圖爲久遠計然召內爲人懦不能安輯其人以先捧不敢至整欠退棲於猛猱四月召散之黨召猛烈召猛養以次被獲其弟僧召龍亦自投首惟召散遁逃未得應琚見夷人之易於摧殄也遂上奏云臣兩月以來訪問召散踪跡逃往阿瓦已飭土司繕寫緬文索取不獻當即興師問罪臣查緬甸連年內亂篡奪相尋實有可乘之會臣謹選人潛往阿瓦將地方之廣狹道路之險夷詳悉繪圖探明奏報現已備可調之兵布置練習密修戎器以待進行疏入帝諭曰應琚久任邊疆必不至輕率喜事如確有把握自可乘時集事剋日奏功倘勞師耗餉稍致張皇轉非慎重籌邊之道務須熟計兼權期於妥善以定行止是時諸將希應琚意爭言內附李勳以猛勇猛散告劉德成以猛龍補哈告華封以整寶景線景海告率侈言夷地廣輪或二千里或二千餘里爲邊外大都應琚一一奏聞以其頭目爲千總守備緬甸通判富森言木邦人殺緬立土司罕黑奉綫整圖爲主願求內屬永昌知府陳大呂亦言蠻暮土司被緬殘虐久願歸誠請發兵爲助應琚乃往駐永昌而遣副將趙宏榜將永順騰越兵

三百餘人出鐵壁關屯新街爲蠻暮捍蔽宏榜抵關遇大呂所遣使驕之而白受蠻暮土司瑞剛降大呂恚訴應琚應琚曲解之是時騰越知州陳廷獻招猛育猛英猛密陳元震招憂鳩允帽結蒙富森招狝狝而宏榜又招孟養乃壩竹孟岳十六寨諸夷先後遣人來約降應琚又爲文檄緬甸言天朝有陸路兵三十萬水路兵二十萬陳於境以待速降不然則進討緬甸乃大出兵緬人素不養兵有事則於所屬土司諸寨籍戶口多寡出夫名曰門戶兵自甕藉牙據阿瓦蓄勝兵萬人一人給以餉四十兩其餘派夫如故每戰則以所派土司濮夷居前勝兵督其後而以馬兵爲左右兩翼戰既合兩翼分繞而進往往以此取勝若自度不可勝則急樹柵自固而發連環槍礮蔽之比煙開則柵木已立入而拒守其兵法如此九月賊先以兵出落卓攻木邦綏甕團不能守入居遮放又以兵溯江而上抵新街宏榜相持兩日勢不支燒其器械輜重及傷病之兵退回鐵壁關駐守而蠻暮土司亦偕其母走入內地應琚憂甚痰疾遽作詔兩廣總督楊廷璋赴滇代治應琚軍並廉宏榜兵收狀又遣侍衛傅靈安挾御醫

診應琚病又命其子江蘇按察使重英湖南寶慶知府重穀赴滇省視之應琚所調兵一萬四千名將集令永順鎮總兵烏爾登額駐宛頂進剿木邦永北鎮總兵朱崙由鐵壁關進駐新街而令提督李時升在杉木箐山中調度崙至楞木突遇賊戰四晝夜賊退走追擊之擒馭之弟卜坑及其舅莽蕭渺節速詭求和言願頂經喫呪水頂經者以經加於首呪水者取水呪之分與其衆飲蓋夷人盟誓之禮也議未定賊已擁衆越神護萬仞關入掠蓋達圍遊擊馬拱垣於蓋達江上分兵入戶撒遊擊邵應泌亦被圍劉德成在千崖有兵二千人坐視不救時升因檄崙還守鐵壁又聞賊欲從庫弄河出關後崙復引兵卻駐守隴川賊勢張甚應琚數以檄促德成始擊賊於銅壁關下破之賊自西而東趨隴川德成亦由戶撒擊其後時升又檄烏爾登額帥宛頂兵至邦中山以助聲勢於是軍威稍振賊人見大兵之集也復來乞降崙以報應琚命許之賊伺我軍懈遂走犯猛卯與木邦親木邦之降猛卯實左右焉賊怨故蹂躪之時三十二年正月丙寅朔也副將哈國興帥兵二千五百人趨猛卯比至見賊勢盛乃



入城與土司堅守賊攻城緣梯而上城上矢礮交發賊不敢近圍八日癸酉副將陳廷蛟遊擊雅爾姜阿各以兵至城中出合擊之賊大潰而烏爾登額久不至故賊得浮猛卯江而逸朱崙乃造浮橋過宿養渡由景陽暮董偕烏爾登額進勦木邦是月丁丑楊廷璋至軍見賊未易遽平遂奏言應琚病已痊臣當歸粵帝召廷璋還京師時賊入關侵擾應琚皆不以聞僅言朱崙殺賊幾萬人賊震懼乞降欲以新街蠻暮與之而時升亦言猛卯之捷誅其大頭目播定酢皮魯布奏入帝視應琚所進地圖用藍筆分中外界而猛卯隴川均在藍線內疑之以爲如果殲賊萬餘及大頭目賊當遁走不暇何以朱崙輾轉退卻賊敢蔓延內地土司之境降旨駁詰而傳靈安先奉詔廉訪軍事具言趙宏榜棄新街朱崙退守隴川及李時升未經臨敵情事與帝所駁詰者悉合應琚復劾劉德成烏爾登額逗留貽誤於是逮李時升朱崙劉德成烏爾登額趙宏榜而晉楊崙爲提督且以應琚欺罔乖謬不能任事乃召明瑞於伊犁以將軍督軍雲南遣額爾景額爲參贊大臣徙巡撫湯聘於貴州以鄂爾代之上年冬緬人已據

整賈景綬召散遂率以攻孟良召丙懼山奔賊延入打樂思茅同知黑元以聞時湯聘未聞上命楊重英方至自江蘇乃偕赴普洱奏言總兵華封甯珠安坐普洱失勦禦請革職治罪奏入華封甯珠與遊擊權恕司邦直都司甘其卓皆被逮調開化鎮總兵書敏總統進勦頃之鄂甯亦至普洱奏言上年九龍江外兵馬以瘴死者不可勝數官弁夫役死亦大半此時正盛瘴發生湯聘乃稱嚴飭將卒尅日進勦懷詐塞責實無誠款奏入湯聘以革職逮治應琚見前所招撫土司復陰附緬其土司頭目夷人千百爲羣皆蕩析離居而緬賊時出沒爲患邊事日棘鄂甯復奏應琚貪功啟釁爲朱崙等諱飾又不令湯聘傳德安與聞邊務及隱沒遊擊班第守備江紀陣亡各狀應琚懼乃奏請是秋大舉征緬調兵五萬五路並進兼約暹羅夾攻帝下其議廷臣皆斥之詔逮應琚至京賜死四月明瑞至永昌時楊甯壁軍木邦餉道爲賊所斷潰退滿河永北鎮總兵索柱及烏爾登額亡其印信明瑞以聞楊甯亦被逮調譚五格爲提督詔派八旗兵三千四川兵八千貴州兵一萬雲南兵四千赴邊進討綠營馬匹皆本營

預備惟八旗兵三千人每兵例需馬三匹合官員所用計馬幾萬匹明瑞議撥廣西馬一千廣東馬八百四川馬五千八百貴州馬六千湖南馬二千每兵裹兩月糧計六斗馱以一馬馬驢少購牛代之糧不足可殺牛以抵共用驢馬牛八百餘其糧於大理鶴慶蒙化三府撥六萬石又於永昌順甯買三萬石兵行之道自宛頂木邦進者爲正兵明瑞身統之烏爾登額譚五格則由猛密分進至新街水路時方暑雨難造舟宜削木柿沿江流下疑賊以牽其勢奏入帝嘉之悉從其議九月諸路兵皆至永昌馬牛亦集甲寅明瑞率軍啟行值大雨潞江舟少以次待渡而溝路陰仄輜重壅塞於道軍士立雨中竟夕十月甲申抵帕兒帝復遣參贊大臣珠魯訥至軍而參贊大臣額爾景額楚姚鎮總兵國柱相繼病歿賊偵知毀津渡橋梁且伐大樹扑之又兩多道壞軍行遲滯明瑞乃選銳兵一半帥以先驅領隊大臣觀音保由孟谷出木邦之右十一月丙戌抵木邦城賊先挾夷民以去獲其糧貯留珠魯訥以兵四千守之進至錫箔江江寬架橋以渡行四日至天生橋橋南有賊砦相偪會商人馬子團言橋之東三

十里水淺可涉且岸頗平乃以兵繞出其後賊復棄砦去遂進至蠻結賊依山立十六柵以待明瑞抵柵下親冒槍礮督兵進攻觀音保麾衆先據山左哈國興等三路登山俯薄之呼而逼其壘貴州步兵王連睨柵左有積木踰之以登躍入柵內八十餘人繼之賊恆亂莫知所措多被殺遂破其一柵旋復攻破三柵而十二柵之賊悉乘夜潛遁捷聞晉封明瑞誠嘉毅勇公以恩澤侯與其弟奎林特擢王連爲遊擊餘俱交部敘功然夷境益峭險其草率綠竹王芻之屬馬乏食多致斃而牛行遲滯錘之以登死者尤衆賊燒其村寨斂積貯而窖埋之掠食無所得軍糧垂竭進至象孔迷失道明瑞度不能至阿瓦約烏爾登額等軍由猛密入其地近孟籠有緬屯糧且可與猛密軍相合乃議向孟籠果大獲糧而烏爾登額等趨猛密出虎踞關聞老官屯有賊意輕之先率衆往攻賊固守弗能下軍士多傷亡陝西興漢鎮總兵王玉廷亦中槍卒珠魯訥守木邦有夷數十人來降疑其僞悉誅之而遣索柱等往錫箔江設臺站以通明瑞軍信息索柱等至蒲卡聞賊至以兵少退守錫箔賊踰之戰歿賊遂傳木邦城下

絕營南水道糧運之從宛頂來者賊又截之軍士皆飢渴火藥亦盡賊審其困  
佯爲好語求和珠魯訥不得已遣楊重英及守備王呈瑞往報賊人留之且誘  
軍士出汲斷其後皆不得還三十三年正月益兵攻城丁未夜兵亂珠魯訥自  
劉死普洱鎮總兵胡大猷亦歿賊之圍木邦也珠魯訥屢促鄂甯救援而永昌  
兵盡行無可調發已而促之急始令遊擊袁夢麟等率駐宛頂兵三百人以往  
遇賊皆不知所之知府陳元震郭鵬翀持參贊印先三日逸出鄂甯捕得之磔  
死明瑞既就糧孟籠諜知烏爾登額未至猛密而諜者報大山土司瓦喇遣弟  
羅旺育來迎且率其子阿隴從軍而緬自去冬象孔改道後獲官軍病卒知糧  
盡不向阿瓦即悉衆躡官軍後官軍且戰且行每日先以一軍拒敵即以軍退  
至數里外成列待軍至則成列者復迎戰明瑞及觀音保哈國興更番殿後步  
步爲營每日行不三十里正月丙午至蠻化營於山巔賊即營山半明瑞曰賊  
輕我甚矣不一痛創之不可時賊識官軍軍號每晨吹波倫者三而起行賊亦  
起次日五鼓復吹波倫三乃盡出營伏箐中以待賊聞波倫聲爭上山來追萬

槍突出四面兜擊賊潰墜者趾頂相藉坑谷皆滿殺四千餘人明瑞休軍蠻化數日取所得牛馬犒士又自蠻化至邦邁虎布蠻移小天生橋獐子壩大小數十戰永順鎮總兵李全歿於陣又稍稍聞木邦失守明瑞恥是役之無功也二月己未至猛育距宛頂糧臺二百里賊蜩集數萬明瑞乃令軍士乘夜出而自與領隊大臣及巴圖魯侍衛數十人率親兵數百斷其後及晨血戰萬賊中無不一當百俄明瑞鎗傷於脇呼從者取水至飲水少許而絕觀音保扎拉豐阿皆戰死死者凡千餘人是夕也星隕如雨餘軍先後潰歸宛頂明瑞自蠻結破賊後懸軍深入帝久不得報命戶部尙書果毅公阿里袞以參贊大臣赴邊援應又聞木邦被困命明瑞旋軍而勅烏爾登額撤老官屯之圍往援木邦賊覺扼馬膂子嶺烏爾登額幾不得出而自旱塔抵猛密木邦有表徑頗近烏爾登額以馬盡糧乏紆道入虎踞關經猛卯至宛頂復駐軍明日而明瑞陣亡之信已至鄂爾劾其有心玩誤詔逮至京磔之并誅譚五格於市而厚卹明瑞其後阿里袞募人至猛育求其屍歸於京師以葬是爲征緬前一役明瑞之死也緬

人不知震其餘威懼再討五月縱所獲兵許爾功等八人自木邦持緬書來且使楊重英王呈瑞等言惜駁之母得罪天朝欲使惜駁內附重英恐緬書繙譯誤乃譯清漢字各一通益以木邦蠟戍頭目苗溫之書苗溫者緬人守土官之稱臘戍在木邦南木邦殘破而臘戍城在嶺下險可守故苗溫徙居於此緬書云暹羅國得楞國得懷國白古國一勘國罕紀國結髮國大耳國及金銀寶石廠飛刀飛馬飛人有福好善之王殿下掌事官拜書領兵元帥昔吳尙賢至阿瓦敬述大皇帝仁慈樂善我緬王用是具禮致貢蒙賜緞帛玉器諸物自是商旅相通初無仇隙近因木邦蠻暮土司播弄是非興兵兆釁致彼此人馬互有傷亡茲特投文敘明顛末請循古禮貢賜往來永息干戈照舊和好阿里袞以聞帝念明瑞軍入關者尙逾萬所喪亡不過十之一二然將帥親臣皆捐軀異域而緬夷求款未親遣頭目非大舉無以雪忠憤命絕之勿報自後緬人數以書與隴正野人及遮放土司訪問許爾功狀皆置不答而以楊重英偷生阿瓦籍其家並置其子於理時大學士公傅恆自請督師乃命爲經略阿桂阿里袞

皆爲副將軍明德爲總督哈國興爲提督八月阿桂詣熱河行在奏言緬賊愍不畏死臣至滇當相度時勢以正天誅不敢鹵莽滅裂誤軍國大事帝領之既陛辭至襄陽會守備程轍前從楊寧軍陷於賊至是密以書來告言緬人方與暹羅仇殺可約以夾攻帝遣人馳問阿桂奏言官軍會合暹羅必赴緬地若由廣東往則遠隔重洋相去萬餘里期會在數月之後恐不能如期帝以爲然蓋自明陳用賓有要暹羅攻緬之說楊應琚楊廷璋先後奏上廷議雖斥之不能釋然也因詔兩廣總督李侍堯詢察之侍堯奏言聞暹羅爲花肚番殘破國主詔氏竄迹他所餘地爲屬下甘恩勅莫士麟分據花肚番者緬人以膝股爲花故云由是約暹羅之議始寢是年冬帝念明瑞所統旗兵勞苦命回京復選旗兵五千人赴滇合荊州貴州四川兵一萬三千人阿里衮乃令副都統綿康曲尋鎮總兵常青帥二千人駐隴川侍衛海蘭察烏爾圖納遜帥二千人駐蓋達領隊大臣豐安鶴麗鎮總兵德福帥二千人駐遮放侍衛興兆巴朗帥一千人駐芒市侍衛王林普爾普帥五百人亦駐蓋達侍衛恒山保永順鎮總兵常保



柱帥三千人駐永昌廣東右翼鎮總兵樊經文帥一千人駐緬寧荊州將軍永瑞四川副都統雅朗阿提督五福帥六千人駐普洱而騰越兵一千令綿康兼轄之防守嚴密邊以無事帝以緬人狡惡思出偏師疑之使其疲於奔命欲出九龍江及舊小皆不果阿里袞乃議勦羗鳩十一月阿桂至永昌聞信馳往會師討之十二月出關焚數寨殲其衆數百人止丹山濮夷團五卒者率四十餘戶來降遷之盡達三十四年二月經略傅恒發京師帝御太和殿授以敕印或告傅恒曰元伐緬由阿禾阿昔二江以進今其蹟不可考意其爲大金沙江無疑前鄂寧言騰越之銀江下通新街南甸之檳榔江流注蠻暮兩江皆從萬山中行石礪層布舟楫不可施若於近江地爲舟具使兵扛運至江澚合成之以入於江下阿瓦既速且可免運糧而師期亦較早一二月緬人必不暇設備又以一隊渡江而西覆其木梳舊巢如此緬不足平也傅恒然其言四月丙辰至永昌條奏進兵事宜皆如所議遂遣護軍統領伍三泰左副都御史傅顯及哈國興率夷人賀內往銅壁關外相視造舟地還報野牛壩山勢爽塏樹木茂密

且距蠻暮河一百餘里於入江爲宜乃令常青等率兵三千人督湖廣工匠四百六十餘馳往造辦又使賀丙潛行招撫賀丙者夏鳩頭目賀洛子也是役也續遣滿洲索倫鄂倫琿春吉林西雙厄魯特察哈爾及白普洱調赴騰越之滿洲兵共萬餘人又福建貴州本省昭通鎮兵共五萬餘人河南陝西湖廣與在省曲靖各府飼養之馬凡六萬餘匹益以四川工呪術之喇嘛京城之梅鍼箭冲天礮贊叭喇烏鎗河南之火箭四川之九節銅礮湖南之鐵鹿子廣東之阿魏雲南省城製造之鞍屨帳幙旗纛火繩鉛藥及鉛鐵灰油麻桌諸船料物悉運往以資軍實乃議分路進傳恒由江西夏鳩路阿桂由江東猛密路阿里衮以肩瘡未愈由水路都計新舊調兵二萬九千人其由夏鳩路者滿洲兵一千五百人護軍統領伍三泰侍衛玉麟納木札五福鄂爾齊烏爾袞保參領滿都虎德保領之吉林兵五百人護軍統領索諾木策凌侍衛占坡圖領之索倫兵二千人副都統呼爾起奎林莽克察侍衛塔尼布克車德受菩薩參領占皮納領之鄂倫春兵三百人侍衛成果領之厄魯特兵三百人侍衛鄂尼積爾噶爾領

之綠營兵四千人提督哈國興開化鎮總兵永平及德福領之其由猛密路者滿洲兵二千人副都統綿康豐安常保柱侍衛海蘭察瑪格喬蘇爾興兆普爾普領之索倫兵一千人散秩大臣葛布舒侍衛額森退領之厄魯特兵三百人侍衛巴朗領之綠營兵四千人曲尋鎮總兵常青永北鎮總兵馬彪楚姚鎮總兵于文煥領之其由水路者健銳營兵五百人侍衛烏爾圖納遜奈庫納領之吉林水師五百人副都統明亮侍衛豐盛額領之福建水師兵二千人福建提督葉相德福建寧鎮總兵依昌阿領之又令副都統鐵保侍衛永瑞領成都滿洲兵一千二百人侍衛富興蒙古爾岱鄂蘭必拉爾海領西雙兵一千人提督本進忠臨元鎮總兵吳士勝領綠營兵二千二百人分守驛站又令侍衛諾爾奔領滿洲兵五百人永順鎮總兵孫爾桂領綠營兵一千人屯宛頂以牽制木邦之賊又令雅朗阿領荊州滿洲兵二千人普洱鎮總兵喀木齊布領綠營兵一千五百人駐守普洱分置賂定而賀丙往戛鳩招撫孟拱挾其頭目脫烏猛以來其言曰上年憤駁遣頭目蓋拉機以千人守猛戛需索煩重土司畏其

偪避往戶工孟拱人苦緬人魚肉久矣聞大軍來皆呀呷忻喜請由戛鳩濟江出孟拱孟拱米穀多可以佐軍食頭目歸當集舟於江以待傅恒上言孟拱遣大頭目來稱歸備舟以候官兵過渡臣思野牛壩造舟之役賊早有見聞若於西岸設伏沿江拒我未易渡也今忽由戛鳩過江先從陸路據蠻暮西岸已出賊意計之外且自戛鳩渡後可將舟楫順流放至蠻暮添備東岸官軍過渡如造舟處有緩急我兵在西岸乘舟往來策應亦最便利臣傅恒謹先統兵進發阿里袞阿桂偕往野牛壩督辦船工癸卯次盡達分道行阿里袞固請從傅恒庚申出萬仞關八月癸丑次允帽允帽江潞也賀丙脫烏猛以舟三十餘來迎丙子次孟拱土司渾覺竄往節東蹤跡之獲其小妻併頭目興堂札願往尋渾覺縱之即日偕以來獻象四傳恒令其人持大羆騎以先夷人望見皆驚駭而予渾覺銀萬兩市牛數千頭米數千石以給軍時阿桂以七月戊申次野牛壩舟工畢八月乙酉進次蠻暮初官兵之裹糧兩月也議以進勦爲始而督工時仍令內地饋運總督明德面諾之不爲具及是移檄往促始令騰越州發運泥

深道遠經月不能至乃奏糧運遲誤狀降明德江蘇巡撫以阿思哈代之九月壬辰阿桂由蠻暮進至新街舟成將出江口賊人從猛戛來逆戰阿桂伏兵廿立寨賊至水陸奮擊發巨礮沉其舟謀而從之笳鼓競作賊大沮退走先是傅恒在江西文報越兩三日輒一至自孟拱而南信益稀阿桂聞蒼浦蠻岡間有伏戎乃募夷問道以書往訊及伊犁將軍伊勒圖總督阿思哈奉命皆至軍中乃以兵二千屬伊勒圖渡江迎傅恒併令玉麟哈青阿率兵據西岸以待伊勒圖渡江遇賊擊走之柵賊一夕皆遁去傅恒率十八騎以是月戊申抵哈坎是時緬人列船江岸且於沙洲及林莽間樹柵以守十月戊午傅恒及阿桂督水師擊之侍衛阿爾蘇納首先乘小舟衝入衆繼進奪其柵獲旗纛器械無算殲頭目寶啞得諾而阿里袞伊勒圖攻西岸諸柵賊皆棄而走丙寅傅恒阿桂循江東岸伍三泰常青循江西岸阿里袞伊勒圖率水師並進丁卯阿里袞以瘡甚卒於舟伊勒圖領其衆已抵老官屯賊柵徑圍三里許柵尾逆還屬於江中瀦水可泊船柵以巨木深入土中外周三壕壕外橫臥大樹銳其枝末外向蓋

其大頭目布拉莽儼所居也西岸頭目得楞孝楞率船一百三十兵三千起兩柵及夕柵木杪皆懸火有頃鼓登登雜以管籥侏離之歌傳呼以達於江西遠近相和竟曉乃輟而老官屯南巴窪章薄賊皆築柵以爲應援庚午進攻其柵經略將軍親摩挲總兵德福中鎗逾日卒乃令舟師絕兩柵中下泊於柵南斷賊江中援救發威遠大礮礮重三千斤子三十餘斤聲如奔雷遇木輒洞以過柵不爲塌又改用火攻之法先以桿牌禦鎗礮衆挾膏薪隨之百牌齊進踰壕抵柵而江自四更大霧起迄平旦始息柵木沾潤不能熬兼值反風遂卻又取生革爲長絙鉤之力急絙輒斷乃伐箐中數百丈老藤夜往鉤其柵役數千指曳之輒爲賊斧斷總兵馬彪乃闕隧窺藥其中深數十丈藥發柵突高起丈餘賊號駭俄柵忽落平地又起又落者三遂不復動蓋柵坡迤下而地道平進故土厚不能迸裂也賊自巴窪章薄來鉛丸火藥糗米卒不得斷絕是以無逃志然惜駁聞新街之敗大懼而攻圍日久死傷者多十一月己丑布拉莽儼乃遣使求罷兵明日復以惜駁書至傳恒阿桂召諸將問可否諸將皆言惜駁從阿

瓦致書非震悚誠切不出此可借此息兵壬辰作檄答之言汝國欲貸天討必繕表入貢還所拘繫官兵永不犯邊境如撤兵背約明年復當深入不汝貸也癸巳緬十三頭目來議事乃遣明亮海蘭察哈齊阿明仁哈國興常青馬彪依常阿于文煥雅爾姜阿等會議申諭所約三事頭目皆拱手聽命哈國興曰汝國僻在海裔不知藩臣典禮汝入貢當具表文文首行書緬甸王臣某奉表大皇帝陛下與安南高麗各外藩等其管五營頭目得勒溫曰謹受教目左右具書以歸丁酉陳錦布毬毯百餘端獻經略將軍而進魚鹽犒軍於是焚舟鎔巨礮奏聞以己亥班師甲辰進虎踞關緬人遣頭目率六十餘人送至關上是日奉旨以緬地瘴癘命貰其罪令渾覺還孟拱而以所進四象送京師伊勒圖傅恒先後還京木邦蠻暮兩土司走入內地後緬蠻團居緬寧之海臘丁山瑞團居蓋達之壩筑其猛密頭人緬官猛亦率衆居綿川戶南山餘遷徙無常處及是移緬蠻團於蒙化移瑞團緬官猛於大理各取官莊租贍之而賀丙則從其請居於萬仞關外之南底壩其後又以召丙叭先捧等分置於寧洱縣之蘇箕

壩而大山之姪阿隴允帽頭目之女老安皆屬縣官予以廩給猛勇頭目召工  
整欠頭目召教景海頭目召別威顯輸誠進獻三十五年二月因緬人貢使不  
至帝令毋許奸商挾貨貿遷以利緬且漏內地消息時阿桂還至省城命核所  
用軍裝馬匹又命總督彭寶檄斥緬入貢使遲滯狀使都司蘇爾相持至老官  
屯布拉莽儻留之阿桂回至永昌察賊狀三十六年三月阿桂奏言蠻暮木邦  
猛密三土司外始有緬人村落距邊已二千餘里偏師不可深入若出近邊則  
所殲乃濮夷野人與緬無損不如休息數年外約暹羅同時大舉帝以大舉非  
計乃罷阿桂以溫福代之明年金川反溫福阿桂皆赴四川而緬亦方用兵暹  
羅於是暹羅滅於緬四十一年金川平時緬甸先遣孟遮等五人以書呈雲南  
總督圖思德總督繫之歸京師及是命赴市曹觀狀且告之故乃縱使歸緬而  
令阿桂以大學士赴永昌備邊緬懼請入貢願出楊重英蘇爾相求開關互市  
明年出蘇爾相而楊重英不至四十三年暹羅遺民起兵逐緬人復國五十一  
年詔封鄭華爲暹羅國王於是緬益懼五十二年耿馬土司罕朝瑗報言滾弄



隔岸即緬甸木邦緬酋孟雲遣大頭目葉渺瑞洞細哈覺控委盧撒亞三名率小頭人從役百餘人齎金葉表文金塔及馴象八寶石金箔檀香大呢象牙漆盒諸物絨氍洋布四種懇求進貢譯其文稱孟雲乃玃藉牙第四子幼爲僧惜駁其長兄也惜駁死子贅角牙立孟雲次兄孟魯以玃藉牙有兄終弟及之諡惜駁死而子襲非約乃戕殺贅角牙欲自立國人不服亦殺孟魯迎孟雲立之孟雲深知父子行事錯謬感大皇帝恩德屢欲投誠進貢因與暹羅構釁且移建城池未暇備辦今緬甸安甯特差頭目遵照古禮進表納貢總督富綱等以聞帝允所請賚其使而歸之且賚孟雲佛像文綺珍玩器皿五十四年孟雲遣使賀八旬萬壽乞賜封又請開關禁以通商旅帝皆從之封爲緬甸國王賜敕書印信及御製詩章珍珠手串遣道員參將齎往其新都蠻得列定十年一貢自是西南無緬患六十年緬王遣使祝釐進緬石長壽佛貝葉緬字經福字證金海螺銀海螺金鑲緬刀金柄麈尾黃緞繖貼金象轎洋槍馬鞍象牙犀角孔雀木化石元猴皮各色呢各色花布都十有八種時有三緬盜逸入印度緬人

以五千人追之突入印度之勢他加境英人領土也英守將爾斯根詰緬人以盜付之嘉慶元年緬王復遣使朝貢總督勒保以緬使甫經回國不宜數來噉雲南司道拒勿納事聞帝諭曰緬甸國王以本年國慶特遣使臣肅表備物申虔稱賀勒保不據實奏聞遽行拒絕致令使臣徒勞跋涉殊失柔遠綏懷之意勒保交部嚴議命軍機大臣擬旨曉諭緬王頒賜蟒錦四端五年緬甸入貢十年冬緬甸復遣使叩關求入貢以是年暹羅伐緬有勅諭暹羅罷兵故也帝以非貢期卻之時緬甸雖失暹羅國勢猶盛其疆城南盡南海北迄孟拱西包阿拉干東聯麻爾古又有揶人之地環其東境舊稱九十九國多爲領屬地廣兵強旣東失暹羅乃西覬印度之富時思襲取緬西北有曼尼坡部又西有阿薩密部緬嘗以兵攻二部漸有從西黑特旁侵入英領之勢西黑特居阿薩密南爲印度孟加東北境過此即克車部英人所保護也緬人恃其習戰蔑視英人後果侵英邊殺英戍兵擄其人民又南侵入勢他加英人以少兵守內府河口之刷浦黎島道光三年緬人攻守島英兵英以衆寡不敵而潰亡數人英人來

責言緬置不答益輕英明年英人伐緬水師副提督喀姆稗兒率師進厄勒瓦  
諦江即大金沙江也次仰光緬人禦諸海口而敗英軍遂登陸攻仰光克曼庭  
村寨緬兵懼每戰輒奔潰然去必燬其積貯堅壁清野以待英人野無所掠糧  
運又不繼遂大困緬王乘其敝自阿瓦遣大隊圍攻之英軍固守不動緬人不  
能勝英軍尋以巨礮反攻緬軍潰邇數月喀姆稗兒乘間攻克艾報墨爾階  
兩城與瀕海地那悉林之地然英軍傷病相屬其強壯能勝戰者僅三千人乃  
移病卒休養於艾報諸城勢復振進攻擺古河口之悉林工場與葡萄牙所築  
舊堡悉取之又克馬爾達般省緬人懼徵鎮守阿拉干長勝軍回援其帥班都  
拉健將也班都拉既至急突英軍不得入乃退而集師十一月班都拉以衆六  
萬攻仰光及克曼庭村寨不克還至丹阿卜掘地營而守喀姆稗兒於是進攻  
普羅美其地西距厄勒瓦諦江約三里許明年英軍分水陸進將軍可敦將水  
師喀姆稗兒將陸軍會於丹阿卜合力奪地營緬將班都拉中礮死遂長驅入  
普羅美城時值大雨約各休兵一月以九月十七日爲期入夏以來英別將馬

立生攻克阿拉干部並逐阿薩密北部緬人進駐克車十月緬軍三路攻普羅美英守將僅有歐人三千印人二千緬軍不能入十二月英人分擊緬軍緬軍沿厄勒瓦諦江敗退各以一萬二千人分入米投麥龍築壘堅守未幾米投破餘兵奔麥龍緬人力竭求成於英英將允之遣人議和款要以四事一割阿拉干艾報墨爾階與意愛各城歸英轄二阿薩密部與各小部緬人毋得干預其治權三賠軍費一千萬羅比四應準各國代理人駐紮緬京且得以兵五十名爲衛英艦之入緬港者毋得勒令繳槍彈船舵議員簽押呈緬王署押緬王不允飭整戰備英將偵知緬王無和意明年一月十九日攻克麥龍城緬人復遣使議和且徵蒲甘兵衛京城英將知非王本意進攻不已緬廷乃使美士迫拉意斯持前署押約章並羅比二百五十萬至英軍乞止兵英乃撤兵去時道光六年也約成緬國遂失西偏沿海地數部然緬國上下均不服此約迨緬王弗極道爲其弟撒拉瓦第所篡撒拉瓦第素主排英尤蔑視前約先是英使臣軍佐白奈駐阿瓦與緬王齟齬而去兩國交遂破英政府撤回駐緬職事人是後

緬人遇英人頗暴厲英艦至緬者緬人常與其水手鬩英廷遣使詰責緬廷且護以水師比英使至仰光謁其督臣語不合英使遂以兵艦封其港責償前英船所受損失費要緬廷禮接英使仰光督臣在英使前謝罪時緬王蒲甘曼嗣立執不允於是英緬再失和而修職貢於中國如故咸豐二年十一月羅繞典奏緬國貢使入京請變通辦理帝諭軍機大臣曰朕念緬甸國王久列藩封貢使遠道輸誠具微忱悃惟其國貢使向取道貴州湖南湖北進京現在粵匪未平若令繞道而行殊非所以示體恤即傳旨其使臣此次無庸來京仍優予犒賞委員護送回國是年緬英再開戰南方嚴城要地盡入於英前所交還擺古部亦爲英撥英將道好西宣言以擺古隸英版圖適緬親王曼同下王於獄自立爲王遣使說印督道好西索還擺古英廷命軍佐雅實勿里爲擺古行政長官且充使以報借雅實勿里行者爲參贊亨利幼兒地質學家倭爾罕挾緬王立永讓擺古之約緬王拒焉久之至同治元年始定約英乃於緬甸海岸設官分部稱英領緬甸即擺古厄勒瓦諾阿拉干地那悉林也以厄勒瓦諾江東支

海口爲會城卽所謂仰光鎮以溫個那職視巡撫初英人欲覓一自英領緬甸通中國商路苦爲緬隔後緬王許英人威廉遊歷緬境北抵八募又溯厄勒瓦詭江而上至江上流之山峽同治六年緬廷與英人結通航緬境之約又命英人代收八募與其他口岸商稅次年緬王曼同薨子錫袍嗣位復命旅於仰光之英工程師威廉生物理學學士愛迭生水師兵官暴厄爾與司忒華德白恩諸人探訪連路而以軍佐斯賴登率之行且諭八募守臣以兵五十人護行於是安抵八募東北之中國騰越廳境八年緬始開厄勒瓦詭江航路上通八募命水師兵官斯討拉爾駐八募理其事緬王頗注重商務凡克亨山一帶危險地皆設官防護英人交口譽之然緬王慙而多忌廢斥舊臣誅鋤兄弟親戚殆盡外官雖有四千六百餘土司皆祿無常俸專賧民膏百姓恆產任意抄沒緬英雖交好而猜忌尤深光緒九年法蘭西由下安南進踞北圻暹羅亦命官分駐老撾土酋各部英據南緬旣久洞知上緬寶藏之區甲於南海且慮法人由北圻西趨曼及緬甸十一年十月三日英首相侯爵沙力斯伯里值倫敦府尹

大宴時宣布伐緬意假判斷木商歇業爲名由印度派兵進攻入蠻得勒擒其王流之於印度孟買海濱拉德乃奇黎島初緬與法蘭西意大利立私約捐自主權利英弗善也至是欲存緬祀則私約不能廢遂決計滅之並取所屬擇人地南緬地區部爲四曰擺古部曰阿拉干部曰厄勒瓦諾部曰地那悉林部北緬地區部爲六曰北部曰中部曰拉歇山嶺部曰南部曰東部曰喀倫尼山嶺部各部皆設行政長官而隸於印度總督緬甸自是遂亡時出使大臣曾紀澤駐英帝以屬國故命與英外部會商緬事初議立君存祀俾守十年一貢之例不可得旋議由英駐緬大員按期遣使資送儀物其界務商務兩事則擬先定分界再議通商英人自以驟闢緬甸全境所獲已多有稍讓中國展拓邊界之意英外部侍郎克蕾稱英廷願將潞江以東之地自雲南南界之外起南抵暹羅北界西濱潞江即洋圖所謂薩爾溫江東抵瀾滄江下游其中北有南掌國南有撣人各種或留爲屬國或收爲屬地聽中國自裁曾紀澤轉咨總理衙門言南掌本中華貢國英人果將潞江以東讓英宜即受之將撣人南掌均留爲

屬國責其按期朝貢並將上邦之權明告天下方可防後患而固邊圉紀澤又向英外部索還八募八募即蠻幕之新街昔時蠻幕土司地甚大後悉併於緬其商貨匯集之區謂之新街洋圖譯音則爲八募距騰越邊外百數十里在大金沙江上游之東龍川江下游之北檳榔江下游之南向爲滇緬通商巨鎮英人以其爲全緬菁華所萃不許爭論久之克藩始云英廷已飭駐緬英官勘驗一地以便允中國立埠且可在彼設關收稅參贊官馬格里言八募雖不可得其東二三十里舊有八募城似肯讓與中國日後貿易亦可大興且允將大金沙江爲兩國公共之江如此則利益與彼分之其隱裨大局尤較得路東之地爲勝議未定紀澤旋回國十二年六月總署與英使歐格訥議約五條第一申明十年呈進方物之例第三中緬邊界應由中英兩國派員會同勘定其邊界通商事宜另立專章約成遷延者五年十七年出使大臣薛福成始申前議奏言英人所稱願讓路東之地南北將及千里東西亦五六百里果能將南掌與擇人收爲屬國或列爲甌脫之地誠係綏邊保小之良圖惟查南掌即老撾之



轉音臣閱外洋最新圖說似老撾已歸屬暹羅若徒受英人之虛惠終不能實有其地非計之得者南掌擇人本各判爲數小國分附緬甸暹羅宜先查明南掌入暹羅之外是否尙有自立之國以定受與不受其向附緬甸之擇人地實大於南掌稍能自立且素服中國之化若收爲我屬則普洱順甯等府邊徼皆可鞏固矣至曾紀澤所索入募之地雖爲英人所不肯舍其曾經默許之舊入募者亦可爲通至大金沙江張本若將來竟不與爭或爭而不得竊有五慮焉夫天下事不進則退從前展拓邊界之論非謂足增中國之大也臣聞乾隆年間緬甸恃強不靖吞滅滇邊諸土司騰越八關之外形勢不全西南一隅本多不甚清晰之界若我不求展出彼或反將勘入一慮也我不於邊外稍留餘地彼必築鐵路直接滇邊一遇有事動受要挾二慮也長江上源爲小金沙江最上之源山藏入滇距邊甚近洋圖卽謂之揚子江我若進分大金沙江之利尙可使彼雖遼稍遠萬一能守故界則彼窺知江源伊邇或設圖行船徑入長江以爭通商之利三慮也夫英人經營商埠是其長技我稍展界則通商在緬甸

設關收稅亦可與之俱旺我不展界則通商在滇境將來彼且來擇租界設領事地方諸務不能不受其牽制四慮也我得大金沙江之利則迤西一路之銅可由輪船遵海北上運費當省倍蓰否則彼獨據運貨之利既入滇境窺知礦產之富或且漸生狡謀五慮也凡此五慮皆在意計之中又查中英所定緬約第一條內緬甸每屆十年向有派員呈進方物成例英國尤由緬甸最大之大臣每屆十年派員循例舉行所派之人應選緬甸國人等語當時中外注意專在申明成例惟緬甸何年入貢並未計及所以但有此約而英之駐緬大員尙未舉行竊恐久不催問此約即成虛設臣查成案緬甸向係十年一貢自道光二十三年入貢後道路不通至光緒元年始復入貢一次計截至光緒十一年正應緬甸入貢之期若不按時理論彼亦斷不過問此與勘界各爲一事未便受其牽制臣擬再加查訪即行文交部請其知照駐緬大員補進光緒十一年應呈方物俟光緒二十一年再按定例辦理萬一彼謂必俟駐緬十年始呈方物則經此一番考覈彼於光緒二十一年之期斷難宕緩矣既而英人不認尤

曾紀澤三端之說謂普洱外邊南掌擇人諸地及大金沙江爲公用之江與八  
募設關也十九年七月福成奏言英人自翻前議難以公法爲解實亦時勢使  
然前議三端既不可恃則展拓邊界之舉毫無把握前歲英兵游弋滇邊以查  
界爲名闖入界內常駐之地則有神護關外之昔董暨鐵壁關外之漢董雲貴  
督臣王文韶迭經電達總理衙門臣承總理衙門急電照會外部斥其違理責  
令退兵又屢赴外部爭論英兵稍自撤退滇邊至今靜謐臣又查野人山地絲  
互數千里不在緬甸轄境之內曾紀澤曾照會外部請以大金沙江爲界江東  
之境均歸滇屬英人堅拒不納其印督至進兵盡達邊外之昔馬攻擊野人以  
示不顧分地之意臣相機理論稍就範圍於是有就滇境東南讓我一地曰科干在南丁  
之說據稱已與印督商定於孟定橄欖壩西南邊外讓我一地曰科干在南丁  
河與潞河中間蓋即孟良土司舊壤計七百五十英方里又自孟卯土司邊外  
包括漢龍關在內作一直綫東抵潞江麻栗壩之對岸止悉劃歸中國約計八  
百英方里又有車里孟連土司轄境甚廣向隸雲南版圖近有新設鎮邊一廳

係從孟連屬境分出英人以兩土司昔管入貢於緬并此一廳爭爲兩屬今亦願以全權讓我訂定約章永不過問至滇兩老界與野人山地毗連之處亦允我酌量展出其駐兵之昔董大寨雖未肯讓歸中國願以穆雷江北現駐英兵之昔馬歸我南起坪隴峰北抵薩伯坪峰西逾南嶂至新陌計三百英方里又自穆雷江以南既陽江以東有一地約計七八十英方里是彼於野人山地亦稍讓矣其餘均依滇省原圖界綫劃分外部於三月二十三日行文照會前來臣先行文外部訂定大局惟騰越八關界趾未清尙須理論外部請待印督所寄地圖又值外部諸員避暑在外稍有停頓前據督臣王文韶電稱淡龍關自前明已淪於緬天馬關亦久爲野人所占踞則八關僅存六關現經再三爭論此二關亦可歸中國又前年英兵所駐之漢董本在界綫之外因其扼我形勢逼處堪虞向彼力索外部亦願退讓以表格外睦誼刻下界務已竣商務本不似界務之繁重且已先將大意議明無甚爭論現正商訂條款計可刻期蒞事尋福成議定商約續爭回鐵壁虎踞二關時二關皆英兵占據也二十年正月

訂滇緬新約十九條劃定自尖高山起向西南行至江洪抵湄江之界綫大金沙江許中國任便行船刪去八募設關一條於是緬事粗結惟十年進呈方物之例英外部初許待至光緒二十三年照約舉行繼稱英廷已豫備光緒二十一年第一次派員赴中國至是又聲請展緩迄未實行云

暹羅在雲南之南緬甸之東越南之西南瀕海灣順治九年十二月暹羅遣使請貢並換給印敕勘合允之自是奉貢不絕康熙二年暹羅正貢船行至七洲海面遇風飄失護貢船一至虎門仍令駛回三年七月平南王尙可喜奏暹羅來餽禮物卻不受其年議准暹羅進貢正貢船二艘員役二十名補貢船一艘員役六名來京並允貿易一次明年十一月國王遣陪臣等齎金葉表文文曰暹羅國王臣森列拍臘照古龍拍臘馬擘陸坤司由提呀菩埃誠惶誠恐稽首謹奏大清皇帝陛下伏以新君御世普照中天四海隸帡幪萬方被教化卑國久荷天恩傾心葵藿今特竭誠朝貢敬差正貢使握坤司咨喇耶邁低禮副貢使握坤心勿吞瓦替三貢使握坤司敕博瓦梯大通事揭希典辦事等臣梯航

渡海齋上金葉表文方物進獻用仲拜舞之誠恪盡遠臣之職伏冀俯垂天聽  
寬宥不恭微臣不勝瞻天仰聖戰慄屏營之至謹具表以聞御前方物龍涎香  
西洋閃金緞象牙胡椒臘黃荳蔻沉香烏木大楓子金銀香蘇木孔雀六足龜  
等皇后前半之帝錫國王緞紗羅各六金緞紗羅各四王妃各減二正副使等  
賞賚有差定暹羅貢期三年一次貢道由廣東常貢外加貢無定額貢船以三  
艘爲限每艘不許逾百人入京員役二十名永以爲例十二年貢使握坤司客  
喇耶邁低禮等至具表請封四月册封暹羅國王賜誥命及駝紐鍍金銀印令  
使臣齋回誥曰來王來享要荒昭事大之誠悉主悉臣國家著柔遠之義朕繼  
承鴻緒期德教暨於遐陬誕撫多方使屏翰躋於康乂彝章具在渙號宜頒爾  
暹羅國森烈拍臘照古龍拍臘馬暉陸坤司由提呀菩埃栗志忠誠服躬禮義  
既傾心以向化乃航海而請封礪山帶河克荷維藩之寄制節謹度無忘執玉  
之心念爾惻忱朕甚嘉尙今封爾爲暹羅國王錫之誥命爾其登矢忠貞廣宣  
聲教膺茲榮寵輯乃封圻於戲保民社而王纂休聲於舊服守共球之職懋嘉

績於侯封欽哉無替朕命二十三年王遣正使王大統副使坤亨述列瓦提齋金葉表入貢帝諭暹羅進貢員役有不能乘馬者官給夫輜從人給舁夫先是貢船抵虎跳門守臣查驗後進泊河干封貯貨物俟禮部文到方准貿易至是疏請嗣後貢船到廣具報即准貿易並請本國採買器用乞諭地方官給照置辦允之頒賞暹羅之犍始折絹貢使回國禮部派司官筆帖式各一人伴送二十四年議定暹羅國王原賞緞三十四今加十六共表裏五十四十七年貢馴象二金絲猴二是年禮官議准暹羅貢船壓船貨物在廣東貿易免其徵稅六十一一年部議暹羅入貢照安南國例加賜國王緞八紗四羅八織金紗羅各二王妃緞織金緞紗織金紗羅織金羅各二是年國王奏稱彼國有紅皮船二前被留禁請令廣東督撫交貢使帶回帝可其請并諭禮部曰暹羅米甚豐足若運米赴福建廣東甯波三處各十萬石貿易有裨地方免其稅部臣與暹羅使臣議定年運三十萬石逾額米糧與貨物照例收稅雍正二年十月廣東巡撫年希堯陳暹羅運米併進方物詔曰暹羅不憚險遠進獻穀種果樹及洋鹿獾

犬等物恭順可嘉歷船貨物概免徵稅用獎輸心向化之誠六年帝諭暹羅商船運來米穀永遠免稅七年常貢內有速香安息香袈裟布疋等帝以無必須之物免其入貢著爲例時貢使呈稱京師爲萬國景仰國王欲令觀光上國徧覽名勝歸國陳述以廣見聞帝命賢能司官帶領遊覽並賞銀一千兩遇所喜物購買使臣復稱本國產馬甚小國王命購數匹帶歸允之命馬價向內庫支給復賜國王御書天南樂國扁額緞二十五玉器八瑱瑯器一松花石硯二玻璃器二瓷器十四貢使赴廣採買京弓銅綫等物復詔賞給乾隆元年六月國王遣陪臣朗三立哇提等齎表及方物來貢增馴象一隻金緞二疋花幔一條並言昔賜蟒龍袍藏承恩亭上歷世久遠難保無虞懇再賜一二襲帝特賞蟒緞四疋禮部奏暹羅照丕雅大庫呈稱伊國造福送寺需銅懇弛禁議弗許帝特賞八百斤八年詔暹羅商人運米來閩粵諸省貿易萬石以上免船貨稅銀十之五五千石以上免十之三其米照市價公平發糶若民間米多官爲收買以補常平社倉或散給沿海標營兵糧之用十三年入貢方物外附黑熊一闕



雞十二太和雞十六金絲白肚猿一十四年國王遣陪臣朗呵派提等入貢錫御書炎服屏藩四字十六年帝諭閩督喀爾吉善等籌辦官運暹羅米法疏陳非便並言不如獎勵商人赴暹羅運米至二千石以上者予議敘給頂戴從之十八年國王遣使入貢懇賜人蔭纓牛良馬象牙及通徹規儀內監禮臣不可帝加賜人蔭四斤特飭使臣歸國曉諭國王恪守規制益勵敬恭二十二年入貢特賜其王蟒緞錦緞各二閃緞片金緞各一絲緞四玉器瑪瑙各一松花石硯二琺瑯器十有三瓷器百有四三十一年暹羅入貢賜與前同頃之兩廣總督李侍堯奏暹羅爲花肚番所破繳還原頒賜物花肚番即緬甸也當其時緬甸攻暹羅進圍其國都阿由提亞三月陷之殺其王暹羅遂亡緬甸曾憤駁旣破暹羅恃強侵雲南邊高宗疊遣將軍明瑞大學士傅恒將軍阿桂阿里衮等征之緬甸調征暹羅軍自救阿由提亞之陷也暹羅守長鄭昭方率軍有事東甬塞聞都城陷旋師赴援疊與緬甸戰構兵數年旣以緬甸困于中國鄭昭乘其疲敝擊破之國復昭中國廣東人也父買于暹羅生昭長有才略仕暹羅旣

破緬軍國人推昭爲主遷都盤谷領撫綏輯國日殷富四十六年鄭昭遣使朗不彩悉呢霞握撫突等入貢奏稱暹羅自遭緬亂復土報仇國人以詔裔無人推昭爲長遵例貢獻帝嘉之宴使臣於山高水長所貢方物收象一頭犀角一石餘物准在廣東出售與他貨皆免稅特賜國長蟒緞珍物如舊制四十七年昭卒子鄭華嗣立華亦材武屢破緬緬酋孟隕不能敵東徙居蠻得五十一年華遣使入貢御前方物龍涎香金鋼鑽沉香冰片犀角孔雀尾翠皮西洋氈西洋紅布象牙樟腦降真香白膠香大楓子烏木白荳蔻檀甘密皮桂皮藤黃外馴象二中宮前無象物牛之並請封十二月戊午封鄭華爲暹羅國王如康熙十二年之例制曰我國誕膺天命統御萬方聲教覃敷遐邇率服暹羅國地隔重洋向修職貢自遭緬亂人民土地悉就摧殘實堪憫惻前攝國事長鄭昭當舉國被兵之後收合餘燼保有一方不廢朝貢其嗣鄭華克承父志遣使遠來具見忱悃朕撫綏方夏罔有內外悉主悉臣設暹羅舊王後嗣尙存自當擇其嫡派俾守世封茲聞舊裔遭亂淪亡鄭氏攝國長事旣閱再世用能保其土宇

輯和人民園國臣庶共所推戴用是特頒朝命封爾鄭華爲暹羅國王錫之誥印尙其恪修職事慎守藩封撫輯番民勿替前業以副朕懷柔海邦興廢繼絕之至意是年粵督穆騰額奏定暹羅正副貢船各一免稅餘船按貨征惟以杜奸商取巧先是緬甸憚國威內附後屢爲暹羅所敗五十三年來貢乞諒暹羅罷兵五十四年正月帝賜鄭華敕曰朕惟自古帝王功隆不冒典重懷柔凡航海梯山重譯而至者無不悉歸油膏咸被恩膏爾暹羅國王鄭華遠處海隅因受封藩職遣使帕使滑里遜通亞排那赤突等恭齎方物入貢謝恩具徵忱悃朕念爾國與緬甸接壤往者惜駁贅角牙相繼爲暴侵陵爾國興師構怨匪爾之由今緬甸孟雲新掌國事悔罪輸誠籲求內附已於其使臣回國時諭令孟雲與爾國重修和好毋尋干戈爾亦宜盡釋前嫌永弭兵釁同作藩封共承恩眷茲特賜國王絲幣等物尙其祇受嘉命倍篤忠忱仰副眷懷長膺天寵欽哉明年鄭華咨稱乾隆三十一年烏肚構兵國破君亡其父鄭昭光復故物十僅五六舊有丹老氏麻叻塗懷三城仍被占據懇諭令烏肚歸還以復國土之舊

粵督郭世勳以聞帝念暹羅所稱之烏肚番卽緬甸前緬甸與暹羅詔氏構兵  
係已故緬酋惜駁非今王孟雲之事丹老氏等三城亦係詔氏在國時被緬甸  
侵占非鄭氏國土相安年久自應各守疆界今暹羅已經易世暹羅又係異姓  
繼立爲王更不當爭論詔氏舊失疆土命軍機大臣代世勳擬檄諭止之是年  
入貢因慶祝萬壽加進壽燭沉香紫膠香冰片燕窩犀角象牙通大海哆囉呢  
九種帝亦加賜國王御筆福字六十年暹羅破東甬寨取阿可耳及破丁蓬二  
地嘉慶元年暹羅遣使進太上皇帝皇帝漢番字金葉表文並方物正月命使  
臣與甯壽宮千叟宴賜正使聖制千叟宴詩一章二年遣使賀歸政及登極貢  
龍涎香冰片等二十四種帝奉太上皇帝命賜鄭華敕曰九服承風建極著會  
歸之義三加錫命樂天廣估冒之仁舊典維昭新綸用沛爾暹羅國王鄭華屢  
供王會久列藩封茲於嘉慶二年復遣使臣奉表入貢鑒其忱悃允荷褒揚至  
以天朝疊慶重熙倍呈方物具見輸誠效順弗懈益虔國家厚往薄來字小柔  
遠自有定制第念爾國僻處海陬梯航遠涉其所備物若從揔卻勞費轉多特

飭收受加賜文綺等物嗣後止宜照常進呈一分以示體恤王其祗承眷顧益懋忠純永膺蕃庶之恩長隸職方之長欽哉三年召暹羅使臣宴重華宮五年國王遣使齎祭文儀物詣高宗純皇帝前進香並獻方物廣東巡撫遵旨令使臣毋庸來京悉將方物齎回六年副貢使怕窩們孫哖哆呵叭病歿廣東諭地方官妥爲照料賞銀三百兩先行回國十年暹羅貢表言與緬甸戰獲捷有詔和解之十二年九月帝諭鄭華不許違例用中國人駕船代運貨物往來以免奸商隱匿致啓訟端倘有違背奸商治罪國王亦難辭其咎特申禁令以嚴踰越之防爾國王其凜遵毋忽十四年遣使祝嘏加賞正副使筵宴重華宮秋鄭華卒世子鄭佛繼立遣使入貢請封遭風沈失貢物九種帝諭不必補進十五年封鄭佛爲暹羅王給誥命駝紐鍍金銀印交使齎回十八年冬總督蔣攸銑奏暹羅正貢船在洋焚毀僅副貢船抵粵副使啣拔察哪不汝知突有疾聞正貢船遭焚驚悲益劇不能即赴都帝命副使留粵調治所存貢物十種派員送京失物毋庸補備且諭曰暹羅國王抒忱納壽沿海申虔即與到京齎呈無異

例賞物件及敕書交兵部發交兩廣總督頒給明年暹羅王聞貢船焚毀補備方物入貢遇颶風船漂散二十年秋正副貢船先後抵粵將攸鈺以聞仁宗嘉其恭順諭曰暹羅向係三年一貢明年又屆入貢之期此次方物可作二十一年例貢暹羅王復表請准川內地水手駕駛部議駁之道光元年暹羅遠征馬來半島開泰州懸軍深入破沙魯他軍南下服派拉克進與色蘭格耳國戰以軍疲由新格拉而還三年遣使入貢賀萬壽四年鄭佛在位十五年傳位其子鄭福明年遣使入貢請封舟毀貢物沈沒帝免補進仍封鄭福爲暹羅王福朝貢益恭十九年三月宣宗以暹羅服事之勤諭曰暹羅三年一貢其改爲四年咸豐元年鄭福卒弟蒙格克托繼立中國稱曰鄭明者是也明奉孝和睿皇后宣宗成皇帝遺詔遣使進香並齎遞表文方物慶賀登極又因例貢屆期請將貢物一併呈進文宗命兩廣總督徐廣縉傳知使臣毋庸來京儀物方物悉令齎回至應進例貢現當國制二十七月之內不受朝賀並停止筵宴俟嗣王請封時再行呈遞二年徐廣縉奏暹羅國王遣使補進例貢並請敕封現已行抵

粵東帝命於封印前伴送來京應給嗣王詰命侯貢使抵都發給齋回適粵匪亂熾貢使竟不能至入貢中國亦於此止此後暹羅遂爲自主之國矣鄭明通佛學善英語用歐人改制度行新政國治日隆稱皇帝復與英法諸國訂約遣使分駐各國同治七年鄭明卒子抽拉郎公繼立廢奴隸行立憲北部亂賊繼起討平之法既吞越南復迫暹羅割湄江東地光緒十九年國王派軍防守法藉口暹羅侵越南出兵占孔格沙丹格托倫格二地復進據老撾之加核蒙隆拍拉朋暹軍敗退湄河西岸法復以海軍攻盤谷海港暹人懇乞和既英人疾法日盛不利于己乃與法立約保證湄南屬暹羅暹羅賴以少安致力內政日蒸蒸日上宣統二年卒子馬活提路特立暹羅版圖北緯六度至二十度東經九十七度至一百七度官制設外務內務財政陸軍海軍司法教育農務交通九部佐國王管理國政另設樞密院國王選親貴勳臣充之國之大事皆諮詢而行中央稱幾甸省全國分十七州置總督州下有縣郡村人口八百萬中國人占三分之一軍備仿德國徵兵制常備軍三萬人戰時可增十倍海軍有礮艦

水雷艇數艘製造槍礮廠造船所皆備暹羅疊出英君政治修明故介於英法諸大國屬地而能自保其獨立也

南掌舊稱老撾雍正七年雲貴總督鄂爾泰疏言南掌國王烏孫遣使奉銷金緡字編蒲表文一道馴象二隻求入貢帝嘉獎其貢道命由普洱府入沿途護送從厚支給八年二月遣使表貢並請定貢期命五年一貢賜之勅諭並文綺等物令使臣齎捧回國九年六月表謝頒勅諭恩乾隆元年賜國王烏孫彩緡文綺八年二月帝以南掌遠道致貢改爲十年一次十四年正月貢馴象二十六年二月國王准第駕公滿奏言臣母喃瑪喇提拉同臣遣使奉表進馴象二隻慶賀皇上五旬萬壽皇太后七旬萬壽准第駕公滿又別備表文一貢象二宴賞如例六月十三日禮臣議嗣後各省巡撫值南掌琉球蘇祿安南等國貢使到境遴委同知通判中一員武弁守備一員伴行長送至京並知照經過各省添派妥員護送按省更替貢使回國亦一例辦理從之又奏南掌外藩入貢使臣俱於陳設鹵簿之日帶領道旁瞻仰天顏備觀儀典今國王准第駕公滿



遣使叭哩細哩門遮昆來京擬於七月初八日聖駕起鑾之期帶領大東門道旁叩見四十七年國王召翁遣使臣叭整哄等四人入貢帝於山高水長連日賜茶果又賜宴於紫光閣三無私殿五十五年國王表貢馴象祝釐並附進例貢帝諭雲貴總督富綱派員護送南掌貢使定於七月二十日至熱河行在與蒙古王公各外藩貢使同預壽筵五十八年諭免例進貢象明年國王召溫猛遣使請封特頒誥敕並駝紐鍍金銀印交使臣齎回六十年國王奉表祝釐進長生經一卷阿魏二十斤象牙四十夷錦四十時召溫猛已播遷越南昭晉州地既受敕印仍未能返國嘉慶四年國王遣使齎表懇求赴京進香帝諭止之令雲貴督臣由驛進呈金葉表文所貢檀香三枝交太常寺十二年國王遣使進馴象四隻象牙四百斤犀角三十斤土絹一疋帝賞賚有加十四年越南國王阮福映遣使恭繳南掌敕印帝諭曰南掌國王召溫猛懷懦不振流徙越南遺棄敕印朕念其流離不加聲責豈能復掌國事聽其在越南居住可也其國事以其伯召蛇榮代辦二十四年召蛇榮子召蟒塔度臘虔修職貢籲懇再頒

敕印禮臣覆稱前繳印信字畫完好毋庸另鑄准於頒給敕印外再給誥命一道交召蟒塔度臘祇領道光二十二年遣使齎勅封召喇嘛呢呀宮滿爲南掌國王咸豐三年南掌國長召整塔提拉宮滿遣使叩關請入貢帝以南掌貢使向由貴州湖南湖北河南取道進京惟現在粵匪未盡殲除命雲貴督臣吳文鎔等即傳諭南掌使臣此次毋庸來京仍優與犒賞俾先行回國貢物象隻卽由督臣派員送京然自是雲南回匪亂起貢道遂絕時南掌兼貢越南之順化暹羅之曼谷嗣越南衰南掌入暹羅號爲暹羅屬國光緒十一年法人得越南全境以南掌地居湄公江中間爲傳教通商孔道復設法保護之於是南掌又折入於法矣南掌國都曰隆勃刺邦據湄公江左岸江東折南流南岡江自東來會曲注如玦環城在山下當南岡江會流處水穿城而過王宮在城之北背山建屋規制壯麗佛墓寺塔森立城市中瀕江兩岸多花園居民大半老撾種或喀木種老撾種人俗同暹羅不文身雕題性愚而頗奉佛教好生惡殺務耕種畜牧能鑄造紡織其狀貌短小鼻寬而脣厚膚色紅紫剪髮留頂不蓄鬚男

子衣飾橫布一幅圍腰至膝富貴者以紬緞爲之婦人下裳似裙上服摺蓋於胸髮黝黑鬢垂於後項耳手足皆帶環圈以金銀銅爲飾其房屋率用簾竹縛造富室官衙則用堅木極壯麗常食粳米雜以秬稻中國人教以製酒醴養蠶絲之法家畜象牛供耕田馱貨其物產有五金各礦稻則有秬有粳多包穀少粟麥有靛青漆藤竹麻棉椰葉桄榔甘蔗檳榔荳蔻煙葉芝麻花生而松木楸木尤多其貨幣或用暹羅之體格或印度之魯卑皆銀錢也此外或用銅錢用鐵錢或用銀錠用海貝然用錢頗少以貨易者爲多天氣溫和自二月至八月多東風多雨九月至正月多北風多晴云

蘇祿南洋島國也雍正四年蘇祿國王母漢末母拉律林遣使奉表貢方物五年六月貢使至京貢珍珠玳瑁花布金頭牙薩白幼洋布蘇山竹布燕窩龍頭花刀夾花標槍滿花番刀藤席猿十二種賜宴賞頒敕諭一道令使臣齎回定期五年一貢貢道由福建十一年六月國王奉表謝恩並奏伊祖東王於明永樂間入朝歸至德州病故帝命有司營葬勒碑墓道諡曰恭定留妻妾僕從

十人守墓畢三年喪遣歸今事隔三百餘年所有墳墓及其子孫存留調恤之處懇請修理給復禮臣議覆蘇祿國東王巴都噶叭哈答歿長子都馬含歸國襲封次子安都祿三子溫哈喇留居守塋其子孫以祖名分爲安溫二姓應如所請飭查王墓所有祠道享亭牌坊修理整飭於安溫二姓中各選一人給頂帶奉祀著爲例帝尤之乾隆五年八月蘇祿國王麻喊味呵稟勝甯遣番丁護送遭風商人回內地八年貢使馬明光奏請三年後復修朝貢帝命仍遵雍正五年所定五年一貢之例十九年蘇祿國王麻喊味安柔律隣遣使貢方物並貢國土一包請以戶口人丁編入中國圖籍帝諭蘇祿國傾心向化其國之士地人民卽在統御照臨之內毋庸復行齎送圖冊二十八年國王遣使貢方物自後遂不復至蘇祿本巫來由番族悍勇善鬪西班牙旣據呂宋欲以蘇祿爲屬國蘇祿不從西人以兵攻之爲所敗獨慕義中國累世朝貢不絕其國小有巉巖之嶺其極南爲石崎山犀角嶼珠池因島環繞海內有珍珠土人與華商市易大者利數十倍此外土產則蘇木荳蔻降香藤條華菱鸚鵡之類戶口繁

多地磽瘠食不足常糴於別島土人奉回教與婆羅洲芒佳瑟民結爲海盜云

清史稿

屬國傳四

廓爾喀

浩罕

布魯特什干

喀爾喀巴達克山

安集延

塔什干

馬木子

坎巨提

廓爾喀在衛藏西南與巴勒布各部相鄰巴勒布三汗曰陽布曰葉楞曰廓庫木後皆爲廓爾喀曾博納喇赤并吞及小部二十三其國境東西二千里南北約五百里東與哲孟雄宗木布魯克巴接壤西與木朗接壤南距南甲噶爾北連後藏邊境傳至孫拉特納巴都爾年幼嗣位其叔巴都爾薩野用事操國大權乾隆五十三年廓爾喀人至藏貿易以爭新鑄銀錢與唐古忒開釁構兵進侵藏界帝命四川總督鄂輝將軍成德往查以巴忠熟悉藏情令爲會辦巴忠遷就議和稱內附帝錫封廓爾喀王爵廓爾喀私責後藏班禪喇嘛賠償銀兩巴忠不以聞既而後藏不能償班禪復與弟紅帽喇嘛沙瑪爾巴不協沙瑪爾

巴因導廓爾喀內侵五十六年廓爾喀遂以唐古忒兵欠款班禪負約爲辭遣兵圍茹拉木唐古忒兵聞風潰進至達木番兵亦敗退八月廓爾喀圍札什倫布將軍成德赴藏援勦帝復命四川總督鄂輝督後隊赴援鄂輝復調金川兵二千雲南兵二千助討九月廓爾喀六七百人攻宗喀陳謨潘占魁等率唐古忒兵固守擊卻之斬首四十六賊退濟隴帝始議大舉往征十月召兩廣總督福康安入京授以方略命爲將軍督參贊海蘭察等由青海赴藏總領大軍討廓爾喀十二月成德次茹拉木四十里戰拍甲嶺敗之明年正月攻克茹拉木東官寨斬其酋呢瑪叭噶嘶及踏巴等二月以地雷破西北碉寨獲咱瑪達阿爾曾薩野巨魯瑪木薩野之姪也茹拉木旣平進軍濟隴三月福康安抵後藏詔進爲大將軍各軍咸受節度廓爾喀築寨據險死守四月福康安偕海蘭察由絨轄茹拉木進決議先勦擦木濟隴擦木地最險兩山夾峙中互山梁五月六日乘夜雨分五隊海蘭察等居中哲森保等由東西山趨賊寨墨爾根保等繞出賊背黎明攻擦木山梁兩石礮克之禽斬二百餘人進至瑪噶爾轄爾甲

濟甯援賊三百據山力拒海蘭察趨進馬中鎗揮軍奮擊盡殲之濟甯賊聞官軍將至建大寨山岡外扼險築三大礮相倚角福康安檄巴彥泰巴彥塞薩崙阿長春攻西北臨河大礮桑吉斯塔爾克色保壽保巴哈張占魁攻東北石上大礮哲森保墨爾根保攻東南山梁上大礮蒙興保綽爾渾等攻山下喇嘛寺阿滿泰額爾登保等攻大寨以惠齡爲策應之軍海蘭察率騎兵張兩翼截擊逸賊六月初六日哲森保等攻克山梁大礮蒙興保等克喇嘛寺復會攻臨河及石上兩大礮皆克之設礮石上戰一晝夜破其東北隅遂拔濟甯斬級六百餘禽二百獲賊目七當福康安之攻濟甯也先遣成德岱森保率兵三千出磊拉木南行牽綴賊勢壁上木薩橋賊築三卡於德親鼎山下建木柵於下木薩橋以拒官軍岱森保悉攻破之於是自擦木至濟甯邊界盡復濟甯西南皆高山峻嶺路險惡距濟甯八十里有熱索橋其大河自東來注渡橋即廓爾喀界也賊屯北岸三四里外索喇拉山設石卡一南岸臨河設石卡二官軍進破喇拉山卡追至熱索橋逸賊甫上橋南岸守橋賊見追兵至倉卒撤橋逸賊皆落



河死官軍隔河施槍河闊不能及乃退還密遣阿滿泰哲森保墨爾根保翁果爾海等率土兵東出綏綵大山繞至上流伐木編筏以濟時賊與官軍隔河相持不虞間道軍驟至倉皇抵抗不能敵潰而奔遂夷二石卡六月十七日福康安海蘭察惠齡等渡熱索橋進密里頂大山山重疊無路徑乃令烏什哈達張芝元開路以進明日抵旺噶爾山勢險峻瑪爾賊大河傍山南注我軍循河東路逼仄不能駐足士卒皆露宿巖下深入賊境百七十里不見一賊尋偵知旺噶爾西南協布魯克瑪賊樹木城外環石壁城西里許夾河築卡城東三十里環克堆築寨以相犄角二十日官軍由旺堆伐樹建橋城賊居高施彈橋不能成我軍以礮轟其城賊隨缺隨補終不得渡二十二日福康安海蘭察由問道越伯爾噶賊興三大山攻克堆賊阻河以拒日暮大雨我兵佯退伏叢林中夜深偷渡毀賊壘五斬級三百餘徑趨協布魯克瑪與惠齡等前後夾擊賊驚潰木城石卡俱下協布魯克瑪既克福康安分道而前一由噶多趨東覺爲正道一由噶多東越山趨雅爾賽拉博爾東拉爲問道海蘭察督桑吉斯塔爾阿滿

泰珠爾杭阿等出間道福康安出正道命台斐英阿等與賊相持於作木古拉巴載山梁躬率額爾登保等潛趨噶多普七月初六日晨渡河破其礮卡進毀寨十一木城五殛賊目蘇必達奈新及巴撒喀爾斬級四百海蘭察亦破賊博爾東拉前山毀木城三石卡七追至瑪拉遇伏擊破之東覺餘賊俱盡兩軍復合進至雍鴉賊據噶勒拉山梁道路崎嶇士卒履皆穿跣足行石子上多刺傷又爲螞蝗嗜嚙兩足腫爛其地多陰雨惟辰巳二時稍見日屆午則雲霧四合大雨如注山顛氣寒凜夜則成冰雪於是頓兵休息當是時成德軍亦克札木過鐵索橋進至多洛卡破賊隴岡覆利底寨八月福康安分軍爲三過雍鴉趨噶勒拉廓爾喀境皆山東西對峙中貫大河自過雍鴉山勢皆南北向噶勒拉堆補木甲爾古拉集木集諸大山層層環抱橫河阻之我軍須渡河仰攻初二日破石卡逼噶勒拉山顛木城侍衛墨爾根保圖爾岱參將張占魁攀堞以登中槍而殞士益奮拋火彈入焚其帳房自辰至未克木城石卡各二殲賊三百餘斃其目五落崖死者無算乘勝追數十里抵堆補木山口之象巴宗賊蜂擁

出拒袁國瓚等陷入陣斃賊百餘復檄珠爾杭阿等攻集木集阿滿泰額爾登保等渡河撲甲爾古拉賊扼險列木柵長數里阻官軍阿滿泰與賊爭橋中槍落水額爾登保等奮呼而進遂渡河斬賊目三斃賊百餘大軍競進集木集賊衆分三道來援殊死鬥福康安躬督戰英貴殞於陣台斐英阿張芝元德楞泰往來奮擊射死紅衣賊目二賊始敗走是役也連戰兩日一夜克大山二大木城四石卡十一斬賊目十三進抵帕朗古深入賊境七百餘里斃六百餘人廓爾喀酋震懼乞降初福康安破東覺賊酋乞降福康安不許檄令拉特納巴都爾薩野躬親至軍并獻禍首及所掠財物賊不應至是拉特納巴都爾薩野遣大頭人稟請交送札什倫布什物繳出西藏所立條約並獻禍首沙瑪爾巴之骨福康安海蘭察惠齡合疏入告曰竊臣等秉承廟算統率勁兵自察木進勦以來連戰克捷邊界肅清遂奪熱索橋深入賊境協布魯東覺博爾東拉噶勒拉堆補木帕朗古諸處皆係峭壁懸崖大河急溜我兵繞山涉水間道出奇賊匪礪卡木城悉行攻克所向無前賊匪敗衄奔逃大兵進至雍鴉送出上年被

裏兵丁王剛諸人具稟乞降旋遣賊目噶布黨普都爾幫哩等迎赴軍前悉將上年被裹之噶布倫丹津班珠爾及兵丁盧獻麟等全行送出稟陳沙瑪爾巴唆使情形悔罪哀祈臣等嚴加駁飭復進兵至帕朗古移營進逼賊匪益加震恐即將沙瑪爾巴眷屬徒弟什物等項及搶掠扎什倫布銀兩物件皆已遵檄呈交並繳出私立合同二張不敢復提西藏給銀之事再三稟求聖主逾格施恩赦其已往以全閩部番民之命茲於八月初八日遣辦事大頭目噶箕第烏達特塔巴蘇巴巴爾底曼喇納甲察布拉咱音達薩野喀爾達爾巴拉巴達爾四名恭齋表文進京並虔備樂工馴象番馬孔雀甲噶爾所製番橋珠佩珊瑚串金銀絲緞金花緞氍毹象牙犀角孔雀尾鎗刀藥材共二十九種隨表呈進另稟懇臣代奏當卽譯閱表文詞意極爲恭順懇至並據第烏達特塔巴等伏地哀懇叩頭乞命至於泣下跪稱廓爾喀部長拉特納巴都爾部長之叔巴都爾薩野本係邊外小番曾歸王化渥受大皇帝天恩特加封爵錫賚多珍高厚恩慈至今頂戴乃拉特納巴都爾年幼無知巴都爾薩野罔識天朝法度因沙

瑪爾巴從中簸弄唆使廓爾喀與唐古忒藉端滋事拉特納巴都爾等輕聽其言侵犯後藏仰煩大皇帝天兵遠討誅戮頭目人衆三四千人攻據地方七八百里天威震疊廓爾喀膽落心驚拉特納巴都爾及巴都爾薩野自知罪在不赦惶懼尤甚從前侵犯藏界之事雖係被人煽惑而孽實自作萬不敢絲毫置辯諉咎於人惟有仰懇轉奏大皇帝大沛恩施開一線之路如蒙允准免其誅滅廓爾喀閭部地土人民皆出大皇帝所賜銜威宏施曷其有極前立合同混行開寫各條萬不敢復提一字廓爾喀永爲天朝屬下每屆五年朝貢之期即差辦事噶策一名仰覲天顏子子孫孫恪遵約束懇求大將軍據情轉奏等語臣等隨諭拉特納巴都爾巴都爾薩野自速誅鋤侵擾藏地天兵至此本應滅爾部落噍類無遺今拉特納巴都爾等敬凜大皇帝天威萬分悔懼屢懇投降降情詞恭順本大將軍不敢壅於上聞當即據實具奏大皇帝如天好生或可仰蒙鑒察宥罪施恩倘荷聖慈允准從此爾部落惟當遵奉天朝法度不得復滋事端方可永受大皇帝天恩保守境土此次天兵威力爾已深知若稍抗違即

是自取滅亡後悔無及其頭目跪聆之下戰慄叩頭感懼之誠形於辭色臣等伏思廓爾喀恃其險遠構釁稱兵上年藏事竣就議和兵威未加罔所祇懼是以投誠甫及兩年復行反覆此次興師問罪仰承聖主指授機宜士卒爭先用命越險摧堅兵到之處屢戰屢勝大半殲擒廓爾喀在西番各部素稱強悍今見天朝兵力精強所向無敵全部震懼屢遣大頭人來營乞降察看情辭實出誠惻伏查前承明旨諭令臣等酌量情形倘軍臨賊境賊匪心懷懼伏悔罪乞哀或可申明約束俯允所請納款班師仰見我皇上廟算精詳幾先指示義正仁育威德覃敷臣等實深欽服今廓爾喀業已悔罪投誠遣大頭人恭進表文請於象馬方物之外虔備樂工使隸於太常附各國樂舞之末並懇定立貢期遣使五年朝貢一次詳察賊情實屬傾心向化不敢再滋事端衛藏全境似可永底敕甯相安無事矣疏入帝允受降諭福康安等籌善後撤兵仍以所獲熱索橋以西協布魯雍鴉東覺堆補木帕朗古各地還廓爾喀熱索橋以內濟噶聶拉木宗喀前屬藏地爲廓爾喀所據者仍歸後藏沿邊設立鄂博如有偷越

即行正法遇有遣使表貢先行稟明邊吏允許始准進口八月廓爾喀曾遣蘇必達巴依喇巴忻喀瓦斯並親信瑪泌達拉喀瓦斯至營呈水牛猪羊各百頭米二百石果品糖食百筐酒百篋犒師福康安諭留牛羊各十頭米十石以荅其誠敬之意餘皆發還復賞錦緞各四疋廓爾喀益感服受約束二十一日班師十月初三日福康安還後藏五十八年正月廓爾喀貢使噶箕第烏達特塔巴等贊貢物至京師帝賜宴命與朝鮮暹羅各使同預朝賀封拉特納巴都爾爲廓爾喀王自是五年一貢聽命惟謹其後英吉利據印度時時被侵略迫訂西古利條約廓爾喀始將西界克美恒山地及開利川河流域割於英廓爾喀既爲英逼動修國政力保自主之權英雖覬覦之無如何也光緒末猶入貢中國云

浩罕古大宛國地一名敖罕又曰霍罕葱嶺以西回國也東與東布魯特接南與西布魯特接西與布哈爾國接有四城俱當平陸一曰安集延東南至喀什噶爾五百里其人長於心計好賈遠游新疆南北各城處處有之故西域盛稱

安集延遂爲浩罕種人之名從安集延西百有八十里爲瑪爾噶朗城又西八十里爲那木干城又西八十里爲浩罕城四城皆濱近納林河惟那木干在河北南北山泉交流會合襟帶諸城之間土膏沃饒人民殷庶其人奉回教習帕爾西語亦布魯特種也其頭目冠高頂皮帽衣錦衣民人戴白氍帽黃褐諸城皆有伯克而浩罕城伯克額爾德尼爲之長衆聽命焉乾隆二十四年將軍兆惠追捕霍集占兄弟遣侍衛達克塔納等撫布魯特諸部至其境額爾德尼迎之入城日饋羊酒瓜果詢中國疆域形勢畏慕奉表請內附並上將軍書稱爲至威至勇如達賚札木西特之將軍旋遣頭目托克托瑪哈穆等貢馬京師二十五年遣侍衛索諾穆策凌齎敕往諭額爾德尼率諸伯克郊迎成禮是爲浩罕屬中國之始浩罕風俗與天山南路諸回部略同而爲勇過之有百回兵不如一安集延之語初大軍追霍集占急霍集占遣使欲投浩罕不報尋霍集占兄弟爲巴達克山所殲波羅尼都次子薩木薩克逃入浩罕浩罕藉其和卓木之名居爲奇貨和卓木譯言聖裔也回教徒尊之所至景從嘉慶二十五年薩



木薩克次子張格爾由浩罕糾布魯特寇邊道光六年張格爾復求助浩罕入寇約破西四城子女玉帛共之且割喀什噶爾酬其勞浩罕曾自將萬人至則張格爾已探喀城無援背前約浩罕怒自督所部攻喀城不下率兵宵遁張格爾使人追誘其衆歸投者二三千人張格爾置爲親兵及西四城破浩罕兵盡得府庫官私之財並搜括回戶殆遍楊芳追張格爾至阿賴嶺遇浩罕伏兵二千軍幾殆鏖戰一晝夜始出險八年張格爾既伏誅其妻子留浩罕欽差那彥成檄令縛獻不從詔命絕其互市困之那彥成並奏驅留商內地之夷且沒入其資產諸夷商憤怒乃奉張格爾之兄玉素普爲和卓木糾結布魯特安集延數千人寇圍喀什噶爾英吉沙爾犯葉爾羌璧昌哈豐阿等拒而破之賊悉掠喀英二城遁出邊十一年浩罕聞大軍且至由伊犁烏什喀城三路出師築邊牆拒守又乞俄援俄弗許浩罕念無外援遂遣頭目至喀城謁欽差長齡呈訴並請通商長齡遣還二使留其一使令縛獻賊目釋回被虜兵民浩罕報言被虜兵民可釋還惟縛獻夷目事回經所無且通商求免稅並給還鈔沒資產長

齡疏言安邊之策振威爲上竊慮次之浩罕與布哈爾達爾瓦斯喀拉提錦諸部落犬牙相錯所屬塔什干安集延等七處均無城池其臨戰皆恃騎賊然在馬上不能施鎗礮倘以鳥鎗連環擊之則騎賊必先奔其卡外布魯特哈薩克向受其欺凌爭求內徙而卡內回衆亦恨其虜掠無人理果欲聲罪致討但選精銳三四萬人整軍而出並於伊犁烏什邊境聲稱三路並進先期檄諭布哈爾等部同時進攻則不待直擣巢穴而其附近諸仇部已乘釁並起可一舉而平之矣惟是大軍出塞主客殊形自喀浪圭卡倫至浩罕千六百餘里中有鐵列克嶺爲浩罕布魯特界山兩山夾河僅容單騎兩日方能出山此路奇險勞師遠涉勝負未可盡知今擬遣還前所留來使一人令伯克霍爾敦寄信開導爲相機驅縻之計蓋浩罕四城外有三小城曰窩什在東南曰霍占在西南曰科拉普在西北塔什干別爲一部屬右哈薩克亦附浩罕稱浩罕八城故云所屬七處也奏入詔一切皆如所請浩罕大喜過望遣使來抱經盟誓通商納貢焉是時浩罕曾讓哈馬阿里勢頗張既與中國和北結俄羅斯南通印度其人

有才略而性淫暴徵民女納父妾布哈爾曾遣使責之謨哈馬阿里怒覺其使布哈爾遂率衆攻浩罕擒斬謨哈馬阿里及其父妾並俘獲姬妾四十車凱旋以伊布拉興留守遣使至中國卡倫告捷時道光二十二年也會伊布拉興虐浩罕民浩罕叛立西爾阿里布哈爾遣兵二萬來伐有謨蘇滿沽者浩罕人謂布魯曰此可說而下也請先行布魯許之至浩罕乃力勸拒守布哈爾兵至攻四十日不克解圍去於是謨蘇滿沽預國政西爾阿里死次子古德亞嗣立謨蘇滿沽妻以女防之甚嚴不使接賓客會塔什干人犯境謨蘇滿沽挾以出征兵交而古德亞逃入敵軍後塔什干平謨蘇滿沽獲之復載回國六月黨人沙特殺謨蘇滿沽及其黨萬餘人古德亞走布哈爾衆立古德亞之弟馬拉又二年黨人基布查怨望謀逆殺馬拉立古德亞從弟沙漠拉古德亞之在外也爲人傭工以塔什干之力得復國後阿林沽作亂又出奔商於外復以布哈爾之力復國時俄兵日南古德亞不能禦敵請和古德亞有子曰那西亞丁頗得民心種人謀立之誅其貪吝者於是國內亂古德亞奔俄那西亞丁立率黨人叛

俄以俄非回教國也光緒二十九年俄人滅其國置費爾干省 布魯特分東西二部東布魯特在伊犁西南一千四百里天山特穆爾圖淖爾左右古爲烏孫西鄙塞種地其部有五每部各一鄂拓克最著者三曰薩雅克鄂拓克曰薩拉巴噶什鄂拓克曰塔拉斯鄂拓克其酋長戴氈帽似僧家毘盧頂甚銳捲末爲檐衣錦衣長領曲袷紅絲織紅革鞬民人冠無皮飾衣褐先是東布魯特爲準噶爾侵徧西遷安集延乾隆二十年準部平得復故地二十三年六月將軍兆惠等追捕準部餘黨哈薩克沙喇至東布魯特界遣侍衛烏爾金托倫泰往撫抵其游牧珠穆輪地薩雅克薩拉巴噶什兩鄂拓克不自主別推一年長者瑪木克呼里主之年九十餘體碩跌坐腹垂至地不能遠行遣使獻牛羊百頭將軍等燕而示之講武咸詔服天朝騎射之利乞內附於時兼撫定霍索楚啓台兩鄂拓克七月參贊大臣富德復遣侍衛伊達木札布往諭薩婁鄂拓克阿克拜亦率衆五千戶來歸同遣使入朝其貢道由回部以達京師西布魯特與東布魯特相接在回疆喀什噶爾城西北三百里西接布哈爾國道由鄂什山

口踰葱嶺至其地蓋古之休循捐毒也凡十有五部最著者四曰額德格納鄂拓克曰蒙科爾多爾鄂拓克曰齊里克鄂拓克曰巴斯子鄂拓克衣冠風俗皆同東部乾隆二十四年將軍兆惠既定山南追捕逸回道其地其渠長遮道奉將軍書曰額德格納布魯特部小臣阿濟比恭呈如天普覆廣大無外如愛養衆生素資滿佛之鴻仁如古伊斯干達里之神威如魯斯坦天下無敵之大勇富有四海乾隆大皇帝欽命將軍之前謹率所部自布哈爾以東二十萬人衆盡爲臣僕頭目等以未出痘不敢入中國謹遣使入朝京師兆惠以聞詔受之於是東西兩部皆內附凡布魯特大首領稱爲比猶回部阿奇木伯克也比以下有阿哈拉克齊大小頭目喀什噶爾參贊大臣奏給翎頂二品至七品有差歲遣人進馬酌資綢緞羊隻商回以牲畜皮張貿易至者稅減內地商民三分之一二十七年阿濟比所屬鄂斯諸部地爲浩罕所擾新調大臣諭還之明年別部長阿瓦勒比願以其地供內地游牧帝喜許之賜四品服然布魯特人貧而悍輕生重利喜虜掠乾隆以後邊吏率庸材撫馭失宜往往生變嘉慶十九

年孜牙散之案枉誅圖爾第邁莫特其子阿仔霍逃塞外憤煽種類圖報復二十九年叛回張格爾糾布魯特數百寇邊有頭目蘇蘭奇入報爲章京綏善叱逐蘇蘭奇憤走出塞遂從賊道光四年張格爾屢糾布魯特擾邊五年九月領隊大臣色彥圖以兵二百出塞四百里掩之不遇則縱殺遊牧之布魯特妻子百餘而還其曾汰列克恨甚率所部二千人追覆官兵於山谷賊遂猖獗於是八年重定回疆之役迨同治三年布魯特叛曾田拉滿蘇拉滿與庫車土匪馬隆等勾結爲亂逆回金相印等乘之新和淪陷十有餘年光緒四年欽差大臣左宗棠遣劉錦棠收復南八城駐軍喀什噶爾有布魯特頭目來謁錦棠願仍歸中國自言部落十四蓋卽向之西布魯特也而東布魯特接伊犁邊者又有五部曰蘇勒圖曰察哈爾曰薩雅克曰巴斯特斯曰薩爾巴噶什已投附俄羅斯矣光緒初俄人併吞浩罕後西部亦大半爲俄所脅收其附近中國卡倫噶噶內嚮代爲守邊可紀者僅千餘家而已 哈薩克部有三曰東部曰中部曰西部東哈薩克在舊準噶爾部之西北東西千里南北六百里東界塔爾巴

哈臺西界右哈薩克部南界伊犁北界俄羅斯漢康居國地也哈薩克汗阿布  
 賚之告順德納曰我哈薩克之有三玉茲如準噶爾之有四衛拉特也東部者  
 左部也曰鄂圖玉茲謂之伊克準中部者右部也曰烏拉克玉茲謂之多木達  
 都準西部最遠曰奇齊克玉茲謂之巴罕準左部之汗曰阿布賚右部之汗曰  
 脫卜柯依西部之頭人曰都爾遜初阿布賚乘準噶爾平遣使往諭阿布賚投  
 誠遁阿睦爾撒納叛走哈薩克阿布賚納之我兵進敗其衆阿布賚大悔密計  
 禽阿逆以求臣於我會阿逆遁歸準噶爾二十二年阿布賚以其兵三萬助攻  
 阿逆陳情謝罪奉表請內附後阿睦爾撒納奔俄而死阿布賚乃禽其黨額布  
 濟齊巴罕以獻其別部和集博爾根及喀拉巴勒特並率其屬三萬戶來附二  
 十四年以後屢遣使朝貢並賜冠服宴賚如例右哈薩克在左哈薩克之西二  
 千里東界左部西界塔什干南界布魯特安集延諸部北界俄羅斯東南界伊  
 犁亦漢康居五小王地也其汗曰阿布勒班畢特即阿比里斯其巴圖爾有三  
 曰吐里拜曰輝格爾德曰薩薩克拜而吐里拜實專國政乾隆二十二年左部

阿布賚既臣服請招右部會參贊大臣富德方以兵索逆賊哈薩克錫拉至右部時吐里拜方與塔什干交兵爲平之乃下於是吐里拜詣軍門納款奉馬進表請歸附二十三年以後屢遣使入朝恩賜宴賚如例其貢道均由伊犁以達京師今則自中俄定界後哈薩克已分屬兩國矣 安集延亦大宛國地喀什噶爾西北五百里西至浩罕三百八十里其貢道山回部以達京師乾隆二十四年將軍兆惠檄諭協擒逆回霍集占其伯克以逆回未至彼境卽專使籲請入覲二十五年伯克托克托瑪哈墨第等來朝貢賜宴賞賚如例 瑪爾噶朗在安集延西百八十里乾隆二十四年伯克伊拉斯呼里拜率屬投誠 那木干在瑪爾噶朗西北八十里其地東北與布魯特雜處東境踰河卽爲塔什干地乾隆二十四年與浩罕同時輸誠內附 塔什干在喀什噶爾西北一千三百里漢爲康居大宛地唐之石國也居平原有城郭人民奉回教與哈薩克同以三和卓分轄其衆曰莫爾多薩木什曰沙達曰吐爾占舊爲準噶爾屬英爾多薩木什者哈薩克所置和卓也吐爾占逐之與哈薩克構兵乾隆二十三



年參贊大臣富德追捕哈薩克沙喇至其地遣使往撫軍於莽格特城外待之時吐爾占方與哈薩克戰河上因諭以睦鄰守土之義皆感悟釋兵和好如初乃遣其屬默尼雅斯奉表求內屬曰臣莫爾多薩木什恭奉諭音若開薺昧茲邊末敢備外藩罔或有二心謹以準孽額什木札布獻之闕下外臣草莽冀瞻聖容躬服彝訓同歸怙冒永永無極額什木札布者阿睦爾撒納兒子也帝宥而遣之吐爾占亦貢馬稱臣遣子入覲塔什干至是自通於中國列藩臣焉嘉慶中塔什干附浩罕爲浩罕八城之一同治三年俄人以伐浩罕之師奪塔什干開錫爾達利亞省於是塔什干部遂亡塔什干居納林河流域之中樞扼中亞細亞通道納林河今又名錫爾河西北流入鹹海由塔什干西南行踰錫爾河至薩馬爾罕又踰阿母河分入印度波斯北山疴倫不爾厄越烏拉山脉達歐俄而東行可至伊犁河以通中國故俄人置土耳其斯坦總督駐之塔什干山泉暢流其乞爾乞河卡拉蘇河安噶連河皆發源雪山灌溉農田地宜五穀故人民常有餘糧樹木叢雜多果木宜蠶桑而棉花產額尤鉅云 巴達克

山在葉爾羌西千餘里居葱嶺右偏由伊西洱庫爾西稍南行渡噴赤河至其國有城郭部落繁盛戶十萬餘其酋戴紅氍毹小帽束以錦帕衣錦氍毹衣腰繫白絲織黑革鞮其民人帽頂制似葫蘆邊飾以皮衣黃褐束白絲織黑革鞮亦有用黃牛皮者婦人不冠被髮雙垂衣紫氍毹與男子同其國負山險田地腴美築室以居耕而兼牧獵乾隆二十四年八月回曾博羅尼都霍集占兄弟敗奔巴達克山富德率師至其地以博羅尼都霍集占逆狀諭示巴酋素爾坦沙令禽獻時二賊竄入巴達克山之錫克南村詭稱假道往墨克祖國大肆劫掠素爾坦沙縛博羅尼都而以兵攻霍集占於阿爾渾楚哈嶺霍集占退保齊那爾河不能支傷背及乳禽之囚於柴札布柴札布者繫囚處也素爾坦沙遣使詣軍門投款且報禽二賊富德令獻俘進軍瓦罕城以待是時溫都斯坦方以兵臨巴達克山謀劫霍集占兄弟霍集占陰通巴達克山讐國塔爾巴斯會謀洩素爾坦沙遷霍集占兄弟密室以二百人圍而殺之刃其馘以獻並率其部落十萬戶及鄰部博羅爾三萬戶以降二十五年遣額穆爾伯克朝京師貢刀斧

及八駿馬二十七年再遣使來朝二十八年貢馬犬烏槍腰刀後其國爲愛烏罕所併巴達克山酋所居地曰維薩巴特在喀克察河上噴赤河自瓦罕帕米爾流入境繞其東北喀克察河西流入之下流爲阿母河唐書言竭盤陀國治葱嶺負徙多河即巴達克山地也 博羅爾在巴達克山東有城郭戶三萬餘四面皆山西北則河水環之乾隆二十四年既與巴達克山同內附遣其陪臣沙伯克等朝京師二十七年十一月博羅爾伯克沙呼沙默特貢劍斧諸物二十九年貢七首是時博羅爾與巴達克山屢構釁沙呼沙默特乞援於葉爾羌都統新柱遣諭巴達克山遵約束還俘能兵至是沙呼沙默特以所寶七首進貢謝恩三十四年又進玉櫛雙七首博羅爾人別一種築室而居有村落無文字與諸回部言語不通惟衣帽則與安集延相類人皆深目高鼻濃髭繞喉男多女少恆兄弟四五人共一妻生子女次第分認無兄弟者與戚里共之土半沙鹵故其人苦貧地多桑取甚曝乾爲糧飲山羊乳以馬湏爲酒稱其酋曰比以人口爲賦稅生子女納其半賣於各回城爲奴婢值頗昂每口值八九十金

後亦爲阿富汗所併 阿富汗卽愛烏罕其國北界布哈爾南界俾路支東界  
印度西界波斯東西二千餘里由巴達克山西南行約七百里歷依色克米什  
班因察里克爾諸回部越因都庫什山至喀布爾其國都也因都庫什山者葱  
嶺山脉右旋之支迤邐而西名伊蘭高原其地波斯處其西而阿富汗處其東  
本國寶故國分七大部首日喀布爾部內屬部七日岡大害部內屬部四日射  
士當部曰愛拉部內屬部二曰歐潑部內屬部三曰愛乍爾部曰加非利士當  
部內屬部七西與波斯接壤有沙磧餘皆沃壤其氣候高地多寒近低地則熱  
物產果木棉花甘蔗烟草之屬人皆土著業農無遊牧工織毛布著名西域戶  
口約五百餘萬分二十四族每族聚居一地皆自治其長之升降則聽命於王  
焉其人勇猛樸誠出天性易拊循乾隆二十四年大軍追討霍集占兄弟二賊  
欲假道巴達克山赴阿巴曾中道邀而殺之其屬有奔阿者告以情阿曾愛哈  
摩特沙將興師巴曾素爾坦沙懼賂以御賜燈及中國文綺阿遂罷兵且遣使  
密爾漢偕巴使來納欵欲窺中國虛實也二十七年入貢良馬四馬高七尺長

八尺是爲回疆最西之屬國時阿富汗初離波斯獨立自稱算端勢張甚六侵印度北印度大半爲所略愛哈摩特沙死國人爭立紛擾者數十年道光六年德司脫謨哈美德起兵喀布爾統一阿富汗愛哈摩特沙元孫希耶速的逃印度求庇於英十九年英印度總督奧克蘭德攻阿富汗取乾陀羅哥疾甯遂陷喀布爾立速的爲阿富汗王阿人厭速的並起絕英軍歸路英軍敗德司脫謨哈美德仍復位二十九年始與英和英之有事於阿富汗也俄人滅布哈爾次第南侵英人以阿富汗爲印度藩籬抗之尤力光緒間帕米爾分疆之議起英人復以保護阿富汗爲名出而干涉帕事矣帕米爾者葱嶺山中寬平之地供回族遊牧者也帕地有八其中皆小回部錯居乾隆中大部隸屬中國疆陲之使弗絕厥後迤北迤西稍稍歸俄迤南小部附於阿富汗東路中路則服屬於中國於是帕米爾遂爲中俄阿富汗三國平分之地出帕米爾南踰因都庫什山卽達印度故俄人盡力經營之而英人亦遂急起而隱爲之備英之爲阿爭卽不啻爲印度爭也初乾隆二十四年高宗平定回疆窮追賊首至伊西洱庫

爾三戰三捷遂成大功高宗御製碑文勒銘淖爾西域圖志所指爲喀什噶爾西境外地者也當日喀城邊卡西境之玉斯屯阿喇圖什卡僅八十里西南之鄂坡勒卡僅一百二十里道光間欽定邊卡西至烏帕喇特卡一百二十里西北至喀浪圭卡一百五十里道光緒間克復新疆劉錦棠始增設七卡於舊界之外十五年又設蘇滿一卡於伊西洱庫爾淖爾北十里是卡距喀城千六百里最爲驚遠僅以布魯特回人守之未駐兵也英使之初議分帕也我國嚴拒之未允其請既而俄兵闌入帕地我國責其稱兵越界俄人即引咎退歸光緒十七年英兵入坎巨提逐其頭目其意在覬覦帕地也新疆巡撫檄馬隊巡歷邊境屯於蘇滿十八年春俄人來言帕地爲中俄兩屬未經勘界中國不應駐兵總理衙門遂電疆撫退兵而仍留蘇滿卡倫俄復請撤新設諸卡然後勘界正相持間而英人陰嫉阿兵突至蘇滿脅擄布回而去俄遂進兵與阿人戰於蘇滿其東隊則遊弋於耶庫里湖阿克塔什漸近喀邊總理衙門疏言我國先駐蘇滿之兵不早撤回則俄阿戰事將自我啟之轉難收束阿雖佔地而適

致俄兵螻觸相爭原可不必過問但其東駁駁逼近邊境頗爲可慮耳蓋阿富汗自乾隆後朝貢不通久置之度外矣至是復一見焉二十一年帕米爾界議始定

坎巨提卽乾竺特在葉爾羌西南約一千五百里自葉爾羌西行入葱嶺至塞勒庫勒之塔什庫爾干卽蒲犁廳也由是西行踰尼若塔什山口又西南至塔克敦巴什帕米爾爲八帕之一由是南踰瓦呼羅特明塔夏兩山口西爲因都庫什山東爲穆斯塔格山出口順根雜河南行又順河折西抵根雜卽坎巨提都城城瀕根雜河北岸西域水道記言塞勒庫勒在葉爾羌之西八百里爲外蕃總會之區自塞勒庫勒西五日程曰黑斯圖濟又西南三日程曰乾竺特卽坎巨提譯文異耳乾隆二十六年其曾有黑斯婁者始內附卽葉爾羌辦事大臣新柱奏稱乾竺特伯克黑斯婁遺子貢金者也其人皆奉瑪罕默德回教其部落東西寬二十里南北長六百里兩山夾立廣大峻削中有大河爲入南疆要隘坎部民住河西河東則哪格爾所屬也根雜城大約三里城北有大山

曰溫吉爾河曰崇帶雅所轄村莊二十五城中居民二千餘其在各莊者約五千餘人城鄉大小頭目一百四十土產牛羊馬匹無布帛盡衣毛褐五穀諸果俱備敵國有犯境者民即爲兵選精壯者出關禦之人皆業農不納糧不徵稅惟歲與其酋耕斂而已每歲貢中國砂金一兩五錢派之民農戶收麥十二斤畜牧家則戶收羊羔一以集此款無他徭也貢使至朝廷賞大緞兩端其貢至宣統間不絕道光間克什米爾國王熱吉苦羅普散令其將布甫山率兵犯境奪坎屬麻雲卡坎酋夏孜牌爾敗之追斬七千餘名克什米爾遣使構和年與坎酋洋銀一千五百元元重二錢五分坎酋以馬二匹細狗二隻報之人謂入貢克什米爾者妄也同治四年克什米爾國王令就貝爾薩再犯境坎王艾贊木復戰敗之蓋至是克什米爾已四犯坎屬矣光緒間俄兵入帕米爾英人聞之率兵至哪格爾並檄坎巨提修平道路備兵進帕地哪格爾首抗英坎酋助之十七年英人敗哪格爾直抵坎城賽必德噶里罕戰敗携眷屬潛遁英人遂據其地先是賽酋私與俄通上降書押結約俄奪佔帕米爾修築堡壘於黑孜



吉牙克阿克素陸爾瓦蘇滿三處並建營於包子滾拜子以扼要衝俄人復書報以金幣千元金絲呢布諸貨六駄快轎六桿賽會悖逆無信不恤部衆且狡而好利屢挑釁英俄以求賄視其部爲市販其副目歪孜爾素執兵權同惡相濟部民皆深忌之至是率其衆五百餘人將奔俄塔墩巴什頭目窩思滿集衆邀之張鴻疇拘諸色勒庫爾屢謀突城出不得後解省羈禁十有七年嗣復安置庫車其子米則拜爾及家屬男女五十二人均編住莎車熱瓦奇莊賽會之外產也脅從之衆悉送還部並諭飭賽會之弟買賣提孜孜木代理坎巨提頭目以安民心出使英法義比大臣薛福成與英外部商定派員會立坎巨提頭略云中國回疆之外向有羈縻各回部惟自咸豐同治以來中國內寇不靖未遑遠略俄國既以兵力吞併浩罕布魯特哈薩克布哈爾諸回部而巴達克山魯善什克南瓦罕諸小部則皆服屬於阿富汗邇來阿富汗爲英屬國英之大勢駸駸由印度北嚮有與俄國爭雄之意而中國西邊之外遂日以多事坎巨提一部近喀什噶爾南界在葱嶺以南厥地縱橫數百里戶口約近萬人近年

屬回之入貢中國者祇此一部蓋即新疆識略之乾竺特一統輿圖及時憲書之喀楚特同音而異譯也英之印度總督歲貼坎巨提經費以助彼整理防務爲名實隱收其內政之權去年夏秋間坎巨提已有赴喀什噶爾告急之舉則以英人築一礮臺俯臨坎境也本年正二月間疊承總署電信以英兵侵坎巨提其頭目連戰不勝率其衆逃詣卡外求援臣以起釁情節詰英外部詢知英兵修築一路直貫坎境北抵興都哥士大山意在扼此隘口以杜俄衆南侵而保印度門戶其頭目興師攔阻爲英兵擊敗踞其所居之棍雜城臣與英相兼外部尙書沙力斯伯里晤商據稱並無滅坎之意亦無阻坎入貢中國之意祇以坎曾罪惡甚多輕慢英官不得不示以懲儆也臣與總署電商因坎曾聲名素劣勢難必使復位其部既係兩屬之國與專屬中國者又稍不同祇可酌就外部之辭與之理論外部語言閃鑠其初次存坎之說既甚游移而必欲據坎之心則甚堅執幸而窺彼隱情頗以俄餒方張亟思聯絡中國不欲歛怨樹敵臣得就此設法磋磨英廷近稱選得舊曾之弟買賣提攷孜木可爲坎巨提頭

目擬請中國派員會同英員行封立之禮已由總署電告新疆巡撫選派安員前往臣與外部商訂儀節華員英員共爲一班克什米爾係英屬國位次應稍居後行禮之期初訂在十八年閏六月二十三日現展至七月二十五日屆時彼此和衷妥辦即可蒞事新疆巡撫陶模即委阜康縣知縣田鼎銘都司張鴻疇前赴坎部會同英員熱布生更立買賣提攷孜木爲坎巨提頭目封立儀節華員居右英員次之英屬克什米爾委員居左稍下新酋又次之張鴻疇宣布皇上德意賞給大綬諭令貢金照舊呈進鎮撫部民毋任剽掠其酋悉俯首聽命云坎部國於山谷中崇峰疊嶽道路險絕中有喀喇闊魯穆大冰山時至十一月積雪甚厚以長毛牛負囊橐而行明塔夏山口高萬四千四百尺路有巨石蓋古時流冰所經地也出山口里許有一流冰過此即易行再喻數洞兩崖壁立頂有積雪至米斯曼居人皆繞爾輶回教不幕有室廬村各爲堡壘石爲之性强悍以寇鈔爲俗然皆酋所使所劫貨物大半歸酋四出剽掠或遠至庫車雅爾山脈下垂如筵水流其間土較腴美近帕蘇又一流冰其融處高八千

尺光緒十五年英人楊哈思班遊至其部坎酋言我受上帝命親斷父母死罪而殺之并殺其兄弟投於山下遂踐是位其悖逆如此或謂其地立國最古殆周時曹奴氏之所居穆天子傳庚辰濟于洋水辛巳入于曹奴曹奴之人獻天子于洋水之上洋水卽棍雜河山海經言洋水西南流注于醜塗之水今棍雜河發源因都庫什山西南流至幾勒幾特城東南入印度河醜塗爲印度轉音醜塗水卽印度河也